

***ASO LUA, 26 ME 2015***

*Na tauaofia le Fono Aoao Faitulafono i le itula e 9:20 i le taeao e tusa ai ma le Polokalame o Fonotaga a le Palemene 2015.*

Tatalo.

**MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.*

**“TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono e iloiloina ai ia Tulafono Tau Faaofi ua faaalia i inei:

1. Tulafono Tau Faaofi o Teuteuga o le Tulafono o Tamaiti 2015.
2. Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2015.
3. Tulafono Tau Faaofi o Teuteuga o le Tulafono o Galuega tau Leoleo 2015.
4. Tulafono Tau Faaofi o Teuteuga o le Tulafono o Lafoga o Tupe Maua 2015.
5. Tulafono Tau Faaofi o Teuteuga o le Tulafono o le Faavae (Nu. 2) 2015.
6. Tulafono Tau Faaofi o Lafoga o Oloa ma Galuega Faatino e Faia i Luga o Aofaiga o Tau 2015.
7. Tulafono Tau Faaofi o le Faatatauina o Tupe Faaopoopo (Nu. 2) 2014/2015.
8. Tulafono Tau Faaofi o le Faatatauina o Tupe 2015/2016.

**TUUINA ATU** i lou nei Lima i lenei aso 25 o Me i le tausaga 2015.

**(Sainia): Tui Atua Tupua Tamasese Efi  
O LE AO O LE MALO.”**

26 ME 2015

## SAUNOAGA FAAFEILOAI A LE FOFOGA FETALAI

**FOFOGA FETALAI:** I le agaga faaaloalo i le ava tele i lenei itula o lenei taeao fou, ou te faatalofa atu ma ou ofo alofa atu i le paia ma le mamalu o le tatou Maota i ona tulaga faalupelupe i le alafai mai i faguga lelei i le soifua manuia o le paia ma le mamalu o le tatou Palemene i ona mamalu ma ona paia maualuga sauoo e masani ai, i le afio o lau Afioga i le Taitai o le Malo lau Afioga i le Palemia ma lau Kapeneta, afio foi lau Afioga i le Taitai o le Itu Agai ma sui usufono mamalu uma o le tatou Maota Fono i lenei taeao.

E manatu e le faaititia le agaga faafetai i le Atua ona o lea ua tatou fesilafai i magafetau ola ma magafetau soifua i le tatou lagima ma le soifua maloloina lelei, ua tatou toe aofaga potopoto ai i lenei taeao fou. O le aso na atofa e le o se aso na faafuaveta sa ioeina e le tatou Palemene, o le aso o le a tatou lauluafesilafai ai e toe faaaauau ma fono talatala le tatou Palemene e ala i le faaauauina o feau ma tiute ma galuega, aemaise o galuega faatino e pei ona faapologikalameina.

Ua ou ofo alofa atu ma faatalofa atu i le tulaga aloaia, malo le soifua manuia, malo le soifua maua, e manatu ua matagofie lenei taeao o lea ua atoatagi le paia o le tatou Maota.

Ou te ofo alofa atu ma faatalofa atu i le paia o le tatou atunuua tatou faatasi i lenei aso, i tupu ma ee, o tamalii ma failauga, faletua ma tausi o saoao ma tamaitai, vaeane a tatou fanau pele ua tatou mafuta i lenei aso, le paia o Faauluuluga o Matagaluega ma Faalapotopotoga a le Malo i ona vaega eseese, malo le galulue, faamalo le onosai faafetai le tautua Malo, o lea ua tatou fesilafai i lenei taeao.

E faapena foi ona ou faafeiloai atu aloaia i le paia ma le mamalu o pule aoga, o faiaoga aemaise o tatou fanau pele i lenei taeao, faafetai ua tatou toe faatasi ona o polokalame aloaia a lou Palemene o le faalauiolina lea o le tatou Palemene e amata mai lava i aoga amata, tulagalua seia oo i kolisi maualuluga, o lea ua tatou feagai i le aso, ia se i outou omai se i outou silasila i mea o lo o nutimea ai ma lipoi ma fai tonu o le atunuua. O le aso ma le filiga, o le aso ma le mataigatila, o a matou nei, a o outou taeao. O le agaga ma le faamoemoe o le tatou Malo i ona tulaga ma polokalame faataatitia ina ia sau malama, ia outou silafia o le a le mea e tau o le Palemene i Samoa? A o lenei taeao, faafetai o lea ua tatou fesilafai, ma ia aoga lo outou faatasi mai ma fai se ai o lenei polokalame.

E ofo alofa atu ma faatalofa atu i le tapuaiga a Samoa le atunuua, ia o ou sa ma ou faiga e nuunuu atu ia faatini o tausala i le tapuaiga i Lana Afioga Mamalu, O Le Ao o le Malo ma lau Masiofo, le Sui o le Fono a Sui Tofia ma lau Masiofo, ia vaeane Tulatoa ma Fuesinaloloa o Samoa i ona tulaga faalupe le paia i Aiga ma o latou Tama, o Tama ma o latou Aiga, e le gata i lea o le fatuaiga tausi i le Aufaitatalo, ia mana pea le upu aua le Atua ma Lona finagalo o lo o ae ma le manuia ai faiva o lenei Palemene. Ia tapuai maia, o le a alo lou Palemene i lenei taeao aua le faatinoga o galuega ua uma ona faataatia.

**26 ME 2015**

### **TUUINA ATU O PEPA**

*Na tolaulaolina e le Failautusi Pepa nei ua faataatia i luga o le Laulau a Fono e tusa ai ma le T.T.48.*

1. P.P. 2015/2016 Nu. 3, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga 2013-2014.
2. P.P. 2015/2016 Nu. 4, Lipoti Faaletausaga a le Komisi o Galuega a le Malo o Samoa 2011-2012.
3. P.P. 2015/2016 Nu. 5, Lipoti Faaletausaga a le Komisi o Galuega a le Malo o Samoa 2012-2013.
4. P.P. 2015/2016 Nu. 6, Lipoti Faaletausaga a le Matagaluega o le Va i Fafo ma Fefatauaiga 2011-2012.
5. P.P. 2015/2016 Nu. 7, Lipoti Faaletausaga a le Pulega o Malae ma Fale Taalo a Samoa 2013-2014.
6. P.P. 2015/2016 Nu. 8, Faamatalaga o Tupe a le Malo mo le Tausaga Faaletupe Faaiuina 30 Iuni 2014.
7. P.P. 2015/2016 Nu. 9, Lipoti Faaletausaga a le Faalapotopotoga o Mea tau Fale a Samoa mo le Tausaga 2014.
8. P.P. 2015/2016 Nu. 10, Tali atu a le Malo i le P.P. 2014/2015 Nu. 132, Lipoti a le Komiti o Mataupu tau Aoga i P.P. 2014/2015 Nu. 33, 34, 35, 36 & 37, Lipoti Faaletausaga a le Pulega o Faailoga ma Tusipasi Taualoa a Samoa mo Tausaga 2008/2009, 2009/2010, 2010/2011, 2011/2012 & 2012/2013.

### **TUUINA ATU O LIPOTI A KOMITI FILIFILIA**

*Na tolaulaolina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).*

1. P.P. 2015/2016 Nu. 11, Lipoti a le Komiti o Mataupu tau Faamasinoga, Leoleo & Falepuipui i le Tulafono Tau Faaofi o le Ofisa Autu o Mataupu Faaletulafono mo Tagata Lautele 2014.
2. P.P. 2015/2016 Nu. 12, Lipoti a le Komiti o Galuega, Tulafono Tumau, Maota Fono ma Mataupu tau Faiga Palota i le Tulafono Tau Faaofi o le Fono a le Au Tusitala ma le Au Faasalalau 2014.
3. P.P. 2015/2016 Nu. 13, Lipoti a le Komiti o Mataupu tau le Va i Fafo, Fefatauaiga ma Tupe Maua i le Tulafono Tau Faaofi o Feagaiga i Sineva 2015.
4. P.P. 2015/2016 Nu. 14, Lipoti a le Komiti o Oloa Gaosia Tulaga Muamua, Mataupu tau Pisini, Alamanuia ma Leipa i le Tulafono Tau Faaofi o Teuteuga o le Tulafono o Faiga Palota (Nu. 2) 2015.
5. P.P. 2015/2016 Nu. 15, Lipoti a le Komiti o Oloa Gaosia Tulaga Muamua, Mataupu tau Pisini, Alamanuia ma Leipa i le Tulafono Tau Faaofi o Teuteuga o le Faavae (Nu. 2) 2014.

**26 ME 2015**

**Lafo a le Komiti o Galuega, Tulafono Tumau, Maota Fono ma Mataupu Tau Faiga Palota**

6. P.P. 2015/2016 Nu. 16, Lipoti a le Komiti o Tupe Maua ma Tupe Totogi i P.P. 2014/2015 Nu. 53, 54 & 55, Faamatalaga tau Tupe a le Malo mo le tausaga 2011, 2012 & 2013.
7. P.P. 2015/2016 Nu. 17, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 158, Fuafuaga Autasi Falemeli o Samoa 2015-2017 & P.P. 2014/2015 Nu. 176, Faamatalaga o Sini Autu a le Falemeli o Samoa 2015-2017.
8. P.P. 2015/2016 Nu. 18, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2014/2015 Nu. 159, Lipoti Faaleausaga a le Falemeli o Samoa 2011-2012 & P.P. 2014/2015 Nu. 205, Lipoti Faaleausaga a le Falemeli o Samoa 2013/2014.

**LAFO A LE KOMITI O GALUEGA, TULAFONO TUMAU, MAOTA FONO MA MATAUPU TAU FAIGA PALOTA**

**Tofa AGAFILI PATISELA ETEUATI TOLOVAA (Sui Taitaifono, Komiti o Galuega, Tulafono Tumau, Maota Fono ma Mataupu tau Faiga Palota):** Faafetai lau Afioga i le Fofoga Fetalai, ae ou te le i faatuina le lafo pei ona tofia ai au e muamua ona avatu le faafetai i lau Afioga e tusa ai foi ma le talosaga molimoli i lenei taeao e faafetaia ai le alofa ma le agalelei o le Atua ona ua toe aofia lona Palemene e pei ona tauopaina.

O lea ua uma ona saunoa faafeiloi lau Afioga i le Taitai o le Malo faapea le aiga Kapeneta, le Taitai o le Itu Agai faapea le Palemene o Samoa ua potopoto, e faapea foi le aofia ua potopoto ma le tapuaiga a Samoa, ma ou te talitonu, o lau saunoaga o lau tala foi lena i lo ta sa seelua.

Ae ua ou tulai atu ma le faaaloalo lau Afioga i le Fofoga Fetalai, ou te faatu atu le lafo, *E tusa ai ma le Tulafono Tumau 46 ina ia faaaauau Galuega Tuua o Tulafono Tau Faaofi mai i le Tauaoifiaga 2014/2015 e pei ona tusia i le Pepa Faaopoopo o Galuega 2015/2016 Nu. 1.*

Faafetai.

*Faaluaina e se tasi o sui usufono mo le Palota Taitoatasi, Susuga Hon Papaliitele Niko Lee Hang, sui usufono mo Aleipata Itupa i Lalo, ma le sui usufono mo Alataua Sisifo.*

*Na faamaonia le lafo ma faamaonia ai e le Fono Aoao Faitulafono le faaaauau o Galuega Tuua o Tulafono Tau Faaofi e pei ona tusia i le Pepa Faaopoopo o Galuega 2015/2016 Nu. 1.*

**26 ME 2015**

## **LAFO MO LE FAATAATIAESE O TULAFONO TUMAU**

**Susuga Hon TUILAEPA FATALOFA AUELUA LUPESOLIAI AIONO NEIOTI SAILELE MALIELEGAOI (Palemia):** Lau Afioga i le Fofoga Fatalai e faapena foi ona auai faatasi i le taulaga na e siitia e faafetai ai le alofa o le Atua i le toe faafoisia mai o Ana auauna nei o sui usufono mamalu o le Maota, aua le tauaofiaga lenei mo mataupu tuua a lo tatou Palemene.

E faatalofa atu foi i le mamalu o Faauluuluga o Matagaluega o lo o tatou auai e faapena foi ia fanau aoga o lo o lautogia i lenei taeao e mataitu Taualumaga o le Fonotaga.

O lea foi ou te tilotilo atu i fanau aoga ua outou matutua ua outou agavaa foi mo le fai monotaga, ai ua leva ona ova i le tai 25 o outou tausaga, ia ae ne i te i ua manatu se isi e faatino mea na ua outou vaavaai mai i ai ma outou faalavelave i se faiga palota lata mai, ia matau lelei mai matou, seiloga e matou te litaea ae ua talafeagai foi ma outou e tou te omai i totonu o le Palemene, ave le faaaloalo i e tatau e ave i ai le faaaloalo.

Lau Afioga i le Fofoga Fatalai, e lua ni lafo ua ou manatu e tatau ona faatu i le taeao nei e tusa o tatou galuega faagasolo.

O le lafo muamua, talu ai ua maea le feiloaiga a sui usufono sa faamalamalamaina ai Tulafono Tau Faaofi fou ia o le a faaofia i le taeao nei, ua ou tulai atu ai e faatu le lafo, *Ina ia faataatia ese Tulafono Tumau 100(1), ina ia avanoa ai le faitauga faalua o nei Tulafono Tau Faaofi i le aso fono e sosoo ai.*

Lua, ona o le taua tele o Tulafono Tau Faaofi nei e lua o le Tulafono o Teuteuga o le Tulafono o Faiga Palota (Nu. 2) 2015 ma le Tulafono o Teuteuga o le Faavae (Nu. 2) 2014, ua ou manatu ai e faatu le lafo, *Ina ia faataatiae Tulafono Tumau 106 ma le Tulafono Tumau 107 ina ia avanoa ai le Iloiloga Auiliili ma le Faitauga Faatolu o ia Tulafono Tau Faaofi e lua i le aso fono lenei.*

O lafo na lau Afioga.

*Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.*

*Na faamaonia le lafo ma tulai ai Tulafono Tumau 100(1), Tulafono Tumau 106 & Tulafono Tumau 107 ua faataatiae.*

## **TULAFONO TAU FAAOFI O TAUMAFA 2015**

### **– faiatuga faatolu**

**FOFOGA FETALAI:** Mo le silafia e lenei Palemene o lenei Tulafono Tau Faaofi, sa faia lona iloiloga auiliili i le aso 22 Aperila 2015.

Tulai mai lau Afioga i le Palemia, i le 1 faatasi ai o le Minisita mo le Soifua Maloloina.

**26 ME 2015**

**Tulafono Tau Faaofi o le Fasimateina o Manu ma le Faasoat o Aano  
o Manufasi 2015 – faitauga faatolu**

**Susuga Hon TUILAEPA FATIALOFA AUELUA LUPESOLIAI  
AIONO NEIOTI SAILELE MALIELEGAOI:** Lau Afioaga i le Fofoga  
Fetalai, ou te tulai atu ma le faaaloalo e faatu le lafo, *Ina ia faitauina nei le  
Tulafono Tau Faaofi o Taumafa 2015 i lona faiitunga faatolu.*

*Faaluaina e le Sui Palemia.*

*Na faamaonia le lafo ma faitauina le Tulafono Tau Faaofi i lona faiitunga  
faatolu ma faapea ona pasia le Fono Aoao Faitulafono.*

**TULAFONO TAU FAAOFI O LE FASIMATEINA O MANU MA LE  
FAASOA ATU O AANO O MANUFASI 2015 – faiitunga faatolu**

**FOFOGA FETALAI:** Mo le silafia e le Palestene o le Tulafono Tau  
Faaofi lenei sa fai lona iloiloga auiliili i le aso 22 Aperila 2015.

Tulai mai lau Afioaga i le Minisita mo Faatoaga ma le Faleoloa o Faatoaga.

**Afioaga Hon LE MAMEA LEMALU SU'A LEATUAVAO  
TUILETUFUGA ROPATI MUALIA (Minisita mo Faatoaga ma le  
Faleoloa o Faatoaga):** E muamua pea ona sii le viiga i le Atua i Lona alofa  
ma Lona agalelei ua taitai manuia mai ai foi lo outou soifua i lenei taeao fou.  
Ou te momoli foi le faafetai mo le sauniga matagofie sa e tulei saunoa i ai lau  
Afioaga i le Fofoga Fatalai. E faafetaia foi lau Afioaga ona e matau atu, ua e  
faatagaina ona tuuina mai igoa matai uma o lenei toeaina faatauvaa, o lo o  
faafofoga mai foi nai o matou nuu ma nai o matou aiga, ia e le faatauvaa foi  
ia te au le latou faaaloalo.

Ae ua ou tulai atu ma le faaaloalo tele lava lau Afioaga, *Ina ia faitauina nei  
le Tulafono Tau Faaofi o le Fasimateina o Manu ma le Faasoat o Aano o  
Manufasi 2015 i lona faiitunga faatolu.*

*Faaluaina e le Minisita mo Galuega tau Alamanuia ma Atinae a le Malo,  
Minisita mo Fesootaiga ma Faamatatalaga Tekonolosi, ma le Minisita mo  
Punaoa Faanatura ma le Siosiomaga.*

*Na faamaonia le lafo ma faitauina le Tulafono Tau Faaofi i lona faiitunga  
faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O LE  
FAAPUTUGATUPE MO LE LUMANAI MANUIA O TAGATA  
2015 – faiitunga faatolu**

**FOFOGA FETALAI:** Mo le silafia e le Palestene o le Tulafono Tau  
Faaofi lenei sa faia lona iloiloga Auiliili i le aso 22 Aperila 2015.

**26 ME 2015**

**Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 – faitauga faatolu**

Tulai mai lau Afioga i le Palemia o le Minisita foi o Tupe.

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fatalai ou te faatu le lafo, *Ina ia faitauina nei le Tulafono Tau Faaofi o Teuteuga o Tulafono o le Faaputugatupe mo le Lumanai Manuia o Tagata 2015 i lona faitauga faatolu.*

*Faaluaina e le Sui Palemia.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O LE FAAPUTUGATUPE MO LE LUMANAI MANUIA O TAGATA 2015  
– iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai.

**Afioga Hon GATOLOAIFAANA AMATAGA ALESANA GIDLLOW (Taitaifono Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai):** Lau Afioga i le Fofoga Fatalai ae ou te le i faatu le lafo, ou te faapipii atu foi i le momolina o le faafetai i lo tatou Atua aua lo tatou faafeagai ai ma o tatou tiute e pei ona e saunoa ai. E faapea foi ona faatalofa atu i le mamalu o le Palemene ma a tatou malo faaaloalogia, ae tainane le faafogafoga mai a le tatou atunuu ma le Malo.

Lau Afioga i le Fofoga Fatalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 faatasi ma le Faasaoga.*

Faafetai.

*Faaluaina e le Sui Fofoga Fatalai, se tasi o sui usufono mo Palota Taitoatasi, Susuga Hon Papaliitele Niko Lee Hang, ma le sui usufono mo Aleipata Itupa i Lalo.*

*Na faamaonia le Lipoti.*

**26 ME 2015**

**Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 – iloiloga auiliili**

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015.

O le a sagai atu le Fono Aoao i le Iloiloga Auiliili o le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

**FUAIUPU 2: Teuteuga i le Tulafono Autu.**

*Faamaonia.*

**FAAMATALAGA:**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o le Faaputugatupe mo le Lumanai Manuia o Tagata 2015.**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa.

Tulai mai lau Afioga i le Taitaifono o le Komiti.

**Afioga Hon GATOLOAIFAANA AMATAGA ALESANA GIDLOW:**  
Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

*Ia faaopoopo le upu (Nu. 2) i le Igoa o le Tulafono ma faitauina ai le Tulafono e faapea:*

**Teuteuga o le Tulafono o le Faaputugatupe mo le Lumanai Manuia o Tagata (Nu. 2) 2015.”**

*Faamaonia le Faasaoga.*

**26 ME 2015**

**Tulafono Tau Faaofi o Teuteuga o le Tulafono o Tamaiti 2015  
- faiatauga muamua**

*Faamaonia le Fuaiupu I ma le Igoa e pei ona Faasaoina.*

*Na faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 faatasi ma le Faasaoga.*

**TULAFONO TAU FAAOFI O TEUTEUGA O LE TULAFONO O  
TAMAITI 2015 - faiatauga muamua**

**Afioga Hon FIAME NAOMI MATAAFA (Minisita mo Faamasinoga ma Pulega tau Faamasinoga):** Lau Afioga i le Fofoga Fetralai ou te faatalofa atu i lenei taeao fou ua alafai mai i faguga lelei le paia o le Maota, tainane foi tatou Malo ua asiiasi mai i lenei taeao.

Ae ou te tulai atu ma le faaaloalo lau Afioga i le Fofoga Fetralai e faatu le lafo, *Ina ia faiataina nei le Tulafono Tau Faaofi o Teuteuga o le Tulafono o Tamaiti 2015 i lona faiatauga muamua.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

*Na faamaonia le lafo ma faiataina le Tulafono Tau Faaofi o Teuteuga o le Tulafono o Tamaiti 2015 i lona faiatauga muamua.*

**TULAFONO TAU FAAOFI O TEUTEUGA O LE TULAFONO O LE  
FETUFAAIGA O FAAMATALAGA TAU LAFOGA 2015  
- faiatauga muamua**

**Tofa Hon TUILOMA LAMEKO (Minisita mo Tupe Maua):** Lau Afioga i le Fofoga Fetralai ua ou tulai atu ma le faaaloalo e faatu le lafo, *Ina ia faiataina nei le Tulafono Tau Faaofi o Teuteuga o le Tulafono o le Fetufaaiga o Faamatalaga Tau Lafoga 2015 i lona faiatauga muamua.*

*Faaluaina e le Minisita mo Galuega Tau Alamanuia ma Atinae a le Malo.*

*Na faamaonia le lafo ma faiataina le Tulafono Tau Faaofi i lona faiatauga muamua.*

**26 ME 2015**

### **TULAFONO TAU FAAOFI O TEUTEUGA O LE TULAFONO O GALUEGA TAU LEOLEO 2015 - faitauga muamua**

**Afioga Hon SALA FATA LISATI PINATI (Minisita mo Leoleo ma Falepuipui):** E muamua lava ona ou momoli atu le faafeai i lau Afioga ma ou faafeiloai atu i le paia o le Maota ua sasao nei.

Lau Afioga i le Fofoga Fatalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega Tau Leoleo 2015 i lona faienza muamua.*

*Faaluaina e le Minisita mo Galuega, Felauaiga ma Atinae Eseese, Minisita mo Aoga, Taaloga ma Aganuu ma le Minisita mo Punaoa Faanatura ma le Siosiomaga.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o Galuega Tau Leoleo 2015 i lona faienza muamua.*

**Afioga Hon Fiame Naomi Mataafa:** Lau Afioga i le Fofoga Fatalai, faamolemole lava e fia fesili atu....

**FOFOGA FETALAI:** Se i tulai mai lau Afioga i le Minisita mo Faamasinoga ma Mataupu tau Faamasinoga.

**Afioga Hon Fiame Naomi Mataafa:** E fia fesili atu i lau Afioga i le Fofoga Fatalai, o lea ua faagasolo nei le faienza o tatou Tulafono Tau Faaofi i lona faienza muamua, na ona faafesili atu lava faamolemole po o i ai ni kopi o tatou Tulafono Tau Faaofi, e le o i ai ni au kopi.

**FOFOGA FETALAI:** Malilie le tatou Ofisa e le i auai le Afioga i le Minisita, aumai se faila i i faamolemole. O lea sa fai le tatou briefing ananafi ma sa faaoo uma faila i sui usufono uma taitoatasi. Faamolemole le tatou Ofisa se i faaoo ifo kopi o tatou Tulafono Tau Faaofi.

### **TULAFONO TAU FAAOFI O TEUTEUGA O LE TULAFONO O LAFOGA O TUPE MAUA 2015 - faienza muamua**

**Tofa Hon TUILOMA LAMEKO:** Lau Afioga i le Fofoga Fatalai faapea foi sui usufono mamalu o le Maota, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2015 i lona faienza muamua.*

*Faaluaina e le Minisita mo Galuega Tau Alamanua ma Atinae a le Malo ma le Minisita mo Fesootaiga ma Faamatatalaga Tekonolosi.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua 2015 i lona faienza muamua.*

**26 ME 2015**

**TULAFONO TAU FAAOFI O TEUTEUGA O LE FAAVAE (NU.2)**  
**2015 - faitauga muamua**

**Susuga Hon TUILAEPA FATALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.2) 2015 i lona faitauga muamua.*

*Faaluaina e le Sui Palemia.*

*Na faamaonia le lafo ma faitauina le Tulafono Tau Faaofi o Teuteuga o le Faavae (Nu.2) 2015 i lona faitauga muamua.*

**TULAFONO TAU FAAOFI O LAFOGA O OLOA MA GALUEGA FAATINO I LUGA O AOFAIGA O TAU 2015 - faitauga muamua**

**Tofa Hon TUILOMA LAMEKO:** Lau Afioga i le Fofoga Fetalai faapea foi sui usufono mamalu ua aofia i totonu o lenei Maota, ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Oloa ma Galuega Faatino i Luga o Aoifaiga o Tau 2015 i lona faitauga muamua.*

*Faaluaina e le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi o Oloa ma Galuega Faatino i Luga o Aoifaiga o Tau 2015 i lona faitauga muamua.*

**TULAFONO TAU FAAOFI O TEUTEUGA O LE TULAFONO O FAIGA PALOTA (NU.2) 2015 - iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti o Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai lau Afioga i le Taitaifono o le Komiti o Oloa Gaosia Tulaga Muamua, Mataupu tau Pisini, Alamanuia ma Leipa.

**Afioga Hon LEAUMEPE TOLEAFOA APULU FAAFISI (Taitaifono o le Komiti o Oloa Gaosia Tulaga Muamua, Mataupu tau Pisini, Alamanuia ma Leipa):** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Faiga Palota (Nu. 2) 2015 faatasi ma Teuteuga.*

Faafetai.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

*Faaluaina e le sui usufono mo Siumu.*

**Afioga Hon FIAME NAOMI MATAAFA:** Lau Afioga i le Fofoga Fetalai ..

**FOFOGA FETALAI:** Tulai mai lau Afioga i le Minisita.

**Afioga Hon FIAME NAOMI MATAAFA:** Lau Afioga i le Fofoga Fetalai, ona o le Lipoti lenei e faatino i se Tulafono sa ou tuuina mai i totonu o le Palemene, ma ou te tulai atu e fia fai sina Teuteuga laitiiti i le mau a le Komiti. Ma e i le faaopoopo o upu nei i le faaiuga o le mau a le Komiti, o upu nei: *I le noatia ma le fai fuafua, i le iloiloga o le Lipoti e le Fono Aoao.*

O le lafo lea faamolemole lau Afioga.

*Faaluaina e le Sui Palemia.*

**Afioga Hon FIAME NAOMI MATAAFA:** Leai lau Afioga ou te fia tautala faamalamalama i le mafuaaga o le toe teuteuga, ona e pei ona saunoa mai lau Afioga i le Tulafono Tumau e ao ona pasia muamua e le Tulafono, ia ona fai ai lea o le saililiga auiliili o le Tulafono. Ae peitai i le taatia mai o le Lipoti a le Komiti, o lo o i ai i le Fuaiupu e 5 ia se eseesege o le mau a le Komiti ia ma le Tulafono na faataatia atu, ma e ou te manatu lau Afioga i le Fofoga Fetalai, o le autu o le lafo toe teuteu, ina ia mafai ona fai i ai se talanoaga ma se felafolafoaiga i le Fuaiupu lea e 5. Ae taitaiina ia le faamoemoe lau Afioga i le Fofoga Fetalai, pe fai atu le tala i le taimi lenei, pe fai atu i le taimi e oo atu ai le faagasologa o le auiliiliga i le Fuaiupu e 5.

**FOFOGA FETALAI:** Ia ou te taofi o lea ua taatia i lagotonu le faagasologa o tatou galuega pei ona masani ai, ou te talitonu foi e tatau ona tatou faasolo i le faasologa lea ua faataatia mai i le tatou Pepa o Galuega, afai lava e oo atu le tatou galuega i le mataupu tonu lea e finagalo i ai lau Afioga i le Minisita, ona tuu mai pea lea i luma o le lafo e auiliili i ai ma fai i ai le faaiuga a le Maota, pe talia lau lafo, pe teena lau lafo, ona faasolo ai lea o le tatou galuega. Ae le mafai ona ou taliaina i le taimi lenei, ona o lea faatoa amata atu ona tolaulau le auiliiliga o le tatou Tulafono, ae maua le avanoa pe a oo atu lava i le mataupu lea i tulaga masani i se mea o finagalo i ai le Minisita e toe teuteu e ala i le faaiuga ma le fautuaga ua tuuina mai e le Komiti. O lau faaiuga lea Fiame.

**Afioga Hon FIAME NAOMI MATAAFA:** Faafetai i lau Afioga ma ua ou taliaina i le faatagaga a lau Afioga e mafai ai ona fai se manatu faaalia ma se felafolafoaiga i le suiga o le faataatia mai e le Komiti i le Fuaiupu e 5, faafetai.

*Na faamaonia le Lipoti a le Komiti.*

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Tulafono o Faiga Palota (Nu. 2) 2015.

O le a sagai atu le Fono Aoao i le Iloiloga Auiliili o le Tulafono Tau Faaofi o Teuteuga o le Tulafono o Faiga Palota (Nu. 2) 2015.

E tusa ai ma le Tulafono Tumau 102, e amata i le Iloiloga Auiliili o le Tulafono Tau Faaofi i le Fuaiupu 2.

**FUAIUPU 2: Ua teuteuina le fuaiupu 5.**

*Faamaonia.*

**FUAIUPU 3: Ua suia le fuaiupu 19.**

**FOFOGA FETALAI:** O lo o i ai le Teuteuga a le Komiti i le Fuaiupu 3. Tulai mai lau Afioga i le Taitaifono o le Komiti.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te faatu le Teuteuga i le fuaiupu 3 e faapea:-

**“TEUTEUGA:**

*I le maea ai o le parakalafa (b) o le faafuaiupu (2), ia faaofi le parakalafa fou e faapea:-*

**AE VAGANA AI o se sui e Tauva mo Itumalo Tu Taulaga i le Palota Tele 2016 e tatau, ae le i maea le aso e faaulu ai Sui tauva, ona nofo ai i totonu o tuaoi o Itumalo Tu Taulaga ia le itiiti ifo i le 6 masina.”**

Ma lou faaaloalo, faafetai.

**Afioga Hon FIAME NAOMI MATAAFA:** Lau Afioga ona o le lafo ua tuuina mai, ou te lagona lava ou te lagolagoina le Teuteuga a le Komiti ona o lenei fuaiupu faaopoopo e faatino lea i agavaa mo sui tauva. Ma e atonu o lea e manatua e le Maota i le tatou Tulafono na pasia muamua i le toe Teuteuga o le Tulafono o Faiga Palota, sa faataatia mai ai e 6 masina e tatau ona nofoia ai e se tagata ia se fanua umia saoloto, ona faatoa mafai lea ona lesitalaina e avea ma tagata palota.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

O le toe Teuteuga la lea, o le Teuteuga na faaauala mai i le Komiti ma toe faaoo atu i le Kabeneta i ana iloiloga ma ua pasia foi e le Kabeneta, e faamautuina ai o se tagata e fia avea ma sui tauva e ao foi ia te ia ona alaala i luga o se fanua umia saoloto, i totonus o tuaoi ua faatulagaina mo itumalo ia tu taulaga. Ma o le taua o le toe Teuteuga lea, ona o lea faatoa oo mai le Lipoti a le Komiti i le taeao nei, o lea foi e le i faitauina i se tulaga foi lea auiliili, ia atonu o lena ua vave le faitau a outou Afioga i le Lipoti, ae o le taua o le toe Teuteuga lea, ona pe manatua foi, o le Tulafono Toe Teuteu muamua ua uma ona pasia o lea e faapea ai, e mafai ia i latou o i luga o le Lola o Tagata Palota Taitoatas i ona avea automatically, ia, ma se tasi o tagata palota o Lola o itumalo ia tu taulaga e lua. Ae peitai la lau Afioga i le Fofoga Fetalai ma le mamalu o le Palemene, ona o le puipui lena o le Tulafono o le a i ai ni tagata e nonofo i fanua i tua atu o itumalo ua faatulagaina mo nofoia ia tu taulaga. O le Toe Teuteuga la lea e tamau ai, a fia avea le tagata ma sui tauva, e tatau lava ona alaala i totonus o tuaoi o itumalo ia e lua ua faatulagaina.

Ia pei lau Afioga i le Fofoga Fetalai, o ala o mea sa uia, sa avatu e le Komiti ma toe faaoo atu i le Kabeneta e silasila i ai le Kabeneta ma toe faafai mai i le taimi puupuu lava lea sa fai ai le iloiloga a le Komiti, ia ma o lea ua aumai ai le Toe Teuteuga i luma o le Fono Faitulafono.

Ia o se faamatalaga lea ma le faaaloalo lava.

**FOFOGA FETALAI:** Ia se i tulai mai le sui usufono mamalu mo Faleata Sisifo.

**Tofa LEALALEPULE RIMONI AIAFI (Faleata Sisifo):** Faafetai mo le avanoa, faafetai foi i le Afioga i le Taitaifono mo le Lipoti pei ona tuuina mai ma suiga talafeagai. Ae ou te fia fesili i le vaega tonu lea lau Afioga i uiga agavaa o tagata palota taitoatas, o lea ua faamanino mai i le Tulafono ia sui tauva, atoa ai ma tagata palota taitoatas. O le mea la lea e fia maua se malamalamamaaga i lau Afioga i le Taitaifono po o le Tamaitai Minisita, ona o lea e le i faia se Teuteuga o le Lola a le Individual Roll lea e faaaoga i le taimi nei, pe faapefea? Aua i lou talitonuga, e le tatau ona toe faaaogaina le Lola lea, ona o lea ua le o toe i ai ni sui o palota taitoatas, o lea foi e manino le Tulafono faavae ia agavaa e agavaa ai tagata i totonus o le Lola lea, aua o lea a fai le sui fou o le taulaga, o lona uiga e fai foi le Lola o le taulaga. E le afaina le tagata palota taitoatas o lo o nofo i totonus o le boundary, a o tagata e i tua ane o le boundary, e le tatau ona toe i ai i totonus o le Lola lea pe mafai foi ona toe palota i sui o le taulaga ona o le a feteenai ai ma le finagalo o le Matagaluega e faamalosia ai le palota o le tagata lava i le mea o lo o alaala ma afio ai. O le mea lea e fia maua ai se faamalamalamaga lau Afioga, faafetai.

**FOFOGA FETALAI:** Malo. Ua maua le finagalo o le sui usufono, lau Afioga i le Taitaifono e te fia saunoa?

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**Afioga Hon LEAUPEPE TOLEAFOA APULU FAAFISI:** Malo faafetai. O le faapupulaga o le itu lea o le toe pau lenei o le faamoemoe e palota ai i latou ia e i tua atu o le tuaoi, ina ia palota i le Palota Tele lea o lo o lumanai, a maea le palota 2016, ia o i ina la o le a le toe agavaa ai i latou ia i tua atu o tuaoi ia e toe palota i le tulaga o le Lola lea e i totonu o tuaoi ia faataulaga. E pei o le tali atu lea, aua o lea foi ua aumai le vaega o le Tulafono e tuu ai le malosiaga i Lana Afioga Mamalu, O Le Ao o le Malo e faia ai Tulafono Faatonu Tau Soloaiga e ala i le fautuaga a le Kapaneta. O mea uma ia o le a silasila mulimuli ane i ai.

Ma lou faaaloalo, faafetai.

**Tofa LEALAILYEPULE RIMONI AIAFI:** Lau Afioga i le Fofoga Fatalaií .

**FOFOGA FETALAI:** Ia.

**Tofa LEALAILYEPULE RIMONI AIAFI:** O lona lua lau Afioga. E pei o lea ua toe feteenai la le Komiti i le vala lea, aua i lou talitonuga, o lona uiga la i le saunoaga a le Afioga i le sui usufono mamalu, o le a lua Lola e fai ai le palota lea, o le Lola a le Individual ma le Lola a le Area?

**FOFOGA FETALAI:** Se i ou fesoasoani atu le sui usufono mo Faleata Sisifo.

**Tofa LEALAILYEPULE RIMONI AIAFI:** Lelei.

**FOFOGA FETALAI:** E tatau ona ou faamanatu atu leaga o le tatou Komiti lea sa i ai le Lipoti lea, o le tatou manulauti ma le silasila mamao, ona o le fetuunaiga po o fea o le a o i ai tagata nei e i totonu o le Lola lea, a o lea o le a tosi le tuaoi lea o le a tatou sagai atu i le aso ona fai lea o le faaiuga, o le taimi mulimuli lenei ona faatulaga loa lea, o e i fafo atu o le Boundary, agai loa latou i itumalo ua faasaga sao i ai le Boundary, ae tuu mai le tulaga ona o le tulaga e faigata tele ona toe fetuunai i le taimi lenei o le mea foi lena sa i ai le tatou Komiti, ne i te i ua le manatua e lau Afioga, ae o le agaga lena o lea e taumafai mai ai, aua ne i o tatou valetuulima i latou o lea eí .tulou le taua o le itumalo, o le itumalo o Aleisa, ia ma nai nuu na o lea o le a le aafia i le Faaigu a le Palemene i le aso lenei, ia o latou la na e faigata tele ona toe fetuunai, ae a maea le tatou faiga palota nei, ia ona agai loa lea o latou i le mea e agai i ai, ae faamamalu le Boundary o lea o le a pasia i le aso.

**Tofa LEALAILYEPULE RIMONI AIAFI:** Lau Afioga, faafetai mo le faamalamalamaga, leai o lea ou te manatua lelei, manatua foi e eseese o tatou finagalo i le mataupu lea. E faigofie lava le fesili lau Afioga, ua le o toe i ai ni sui Individual, e le o aumaia se suiga i le Tulafono e sui ai e atagia ai suiga ia.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

O le fesili la lea e faigofie lau Afioga, e fia la Lola lea o le a faaaoga, ae faapefea ona transfer mai le Individual i totonu o le Urban? Aua e tasi le Lola e faaaoga i le palota, na o le Lola o le Urban. E faapefea la ona fetuunai aua o le a tele le faaletonu, a ua le toe i ai ni sui o le Individual, e le tatau foi la ona toe i ai se latou Lola e faaaogaina?

**FOFOGA FETALAI:** O lea ua ou maua lou finagalo le sui usufono mo Faleata Sisifo. Ia malie ia, ou te talitonu e malamalama le tatou mataupu pe a tatou o i le auala faigofie.

**Afioga MAUALAIVAO PAT AH HIM (Palota Taitoatasi):** Lau Afioga i le Fofoga Fetalaií ..

**FOFOGA FETALAI:** Malie se tasi o sui usufono mo Palota Taitoatasi, Afioga Maualaivao Pat Ah Him, se i tuu atu muamua le avanoa i le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai. O le Lola lea e taua lea sa i Palota Taitoatasi, o le aiatatau a le tagata e fai ai lana filifiliga. O lona uiga, e tatau ona filifili, pe nofo i le Lola i tua atu o le Boundary, pe sau i totonu o le Boundary e palota ai, o le mea muamua lea.

Lau Afioga i le Fofoga Fetalai, o le mea lona lua, e tatau foi ona malamalama le aualii ia i tua atu o le tuaoi e le toe aoga le faipule lea i o latou manaoga, aua a sau i i, o le tali i ai, o la e i ai le tama o le itumalo i tua atu o outou, e tatau ona silafia e tagata nei ia le mea e ono oo i ai.

O lona lua lau Afioga, e manaia le Teuteuga lea na saunoa i ai le Afioga i le Tamaitai Minisita i le tulaga lea i le eligibility o candidates i le urban seats. O lau fesili la, a sau la le tagata i Niu Sila e nofo i i lona fanua tumaoti i le 6 masina, e entitle la i ai? Afai la o le a fai le Tulafono lea e fai ai le exemption lea ou te matuai, ua discriminate lava e tatou i a tatou tulafono, ma lou faaaloalo lava.

**Afioga Hon Palusalue Faapo II (Taitai o le Itu Agai):** Lau Afioga i le Fofoga Fetalaií ..

**FOFOGA FETALAI:** Malie lau Afioga i le Taitai o le Itu Agai, o lea o le aí ..ona avatu loa lea o le avanoa. Tulai mai se tasi o sui usufono mo Palota Taitoatasi, Afioga Maualaivao Pat Ah Him.

**Afioga MAUALAIVAO PAT AH HIM:** Faafetai mo le avanoa i lau Afioga i le Fofoga Fetalai, faamalo foi le faatautaiina o le tatou Fonotaga ma lenei mataupu. Ou te talitonu ona o lea ua lotea le mataupu lenei o le Palota Taitoatasi.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

E tulai atu lava ma le faaaloalo ma le ava tele i lau Afioga i le Taitaifono faapea le paia o le Maota i sui usufono mamalu, le Taitai o le Malo. O lo o faafogafoga mai le itumalo lenei o Palota Taitoatasi, ne i te i ua faapea latou ai o le gagana lea e i totonu o le Maota ua leai ni sui usufono mo Palota Taitoatasi, a o lea lava e faaaauau pea ia sui usufono mo Palota Taitoatasi. E le i maea ona tagofia le suiga o le Faavae ona faapena lea ona amanaia ma aloaia le tuuveseeseina o vaega ia le paia o itumalo o tagata Palota Taitoatasi. Ma ou te talitonu foi lau Afioga i le Fofoga Fetalai, ona ua ou vave tulai atu lava ma le faaaloalo tele ona o lo o faafogafoga mai i latou uma o lo o i totonu o lenei Lola, ona e faapea e le tatau ona toe faaaogaina, ia o se gagana e pei e le o atoatoa ona se i silasila i ai leí ..

**Tofa Lealailepule Rimoni Aiafi:** Lau Afioga i le Fofoga Fetalai, faamolemole o se mea e fia faasao e tusa ai i le saunoaga a le sui usufono ona o lea e pei e agai mai.

**FOFOGA FETALAI:** Ia o le a uma ona avatu lea o le avanoa, se i usi mai po o le a tonu le mea la e atugalu ai, o lea ua ou maua lonaí ..

**Tofa Lealailepule Rimoni Aiafi:** O, ia ona aumai lea o le avanoa lau Afioga? Faafetai lava.

**Afioga MAUALAIVAO PAT AH HIM:** Ia faafetai lava, faamalo foi i le sui usufono, leai e le o se faataumatatao, o le lagona lava ia ne i te i ua sese se upu, a o lau faalogo, sa faapea mai e le tatau ona faaaogaina le Lola lea. Peitai ane ua maea onaí ..i se matou iloa vaivai, o le Lola lea o lea ua agai uma mai ma otometi lava le omai i totonu o le Lola lea o nuu tu taulaga, ona o le tulaga lea, ua leai se itumalo, ioe. O fea la o le a agai i ai? Pei ona saunoa lau Afioga i le Fofoga Fetalai i le tulaga moni lea. Na ona ou faapena atu i le paia o le tatou Maota, ae le o se mea e afaina ai se finagalo, na o le faaoloolumaa atu, o le tulaga lea o lo o i ai pea sui usufono o tagata palota taitoatasi, ma le faaaloalo tele lau Afioga i le Fofoga Fetalai.

**FOFOGA FETALAI:** Malo, o lea ua maua lou finagalo.

**Tofa Lealailepule Rimoni Aiafi:** Faafetai lava i lau Afioga. E faamalulu atu foi i le Afioga i se tasi o sui usufono mamalu mo le Palota Taitoatasi, o lau tala lea e fai atu, e le tatau ona toe faaaogaina le Lola, e ese le Lola, ese le tagata palota. O le tagata palota ia e faaaoga lava, o le latou aiatatau lea, a o le Lola, e le tatau ona toe faaaogaina ona ua leai se tagata e palota i ai, a o tagata palota ia, leai e faaaoga o la e i ai, o le la e exist, o le faataitaiga lau Afioga, afai o le finagalo lea o le Matagaluega, o lona uiga foi la, tuu le avanoa ia Safata po o Aana, palota latou i lenei taimi se i sui la i se isi Paeaiga pe afai o lena.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**FOFOGA FETALAI:** O lea ua maua lou finagalo le sui usufono mo Faleata Sisifo.

**Tofa Lealailepule Rimoni Aiafi:** E tatau ona tasi le Tulafono mo tatou uma.

**FOFOGA FETALAI:** Lealaí ..

**Afioga Hon Fiame Naomi Mataafa:** Lau Afioga o le mea e fia faasao.

**FOFOGA FETALAI:** Ia se i tulai mai.

**Afioga Hon Fiame Naomi Mataafa:** O le mataupu lea e saunoa i ai le sui usufono, o le mataupu ua uma ona aiaia i lalo o le Tulafono lea na tatou pasia i le Teuteuga muamua, ma i lou taofi i tatou Tulafono Tumau, ua uma, ma e o le taimi lenei o lea lava o lo o i ai Lola o tagata Palota Taitoatasi aua o lea e alaala mai ia sui usufono e toalua o le Au Palota lena, ae i lalo o aiaiga o le tatou Tulafono ua maea ona tatou pasia, e i ai le transition\_i le faaiuga o le Paeaiga lenei o le a transit ese mai ai loa ia le Lola lea o Palota o Tagata Taitoatasi, ae amata ona aloaia ia Lola o itumalo tu taulaga. Ae o lea o lo o i ai le avanoa ia i latou o lo o i totolu o le Lola o le Palota Taitoatasi i le taimi lenei as a transitional provision i le mea foi lea sa saunoa i ai lau Afioga ina ia le tiaia se vaega o tagata palota e mafai ai ona fai ai le filifiliga a le tagata palota o le Lola o le Palota Taitoatasi, pe alu loa ia, e palota i le mea lea e nofo ai, pe palota i totolu o tuaoi o itumalo tu taulaga, pe a faapea ona ia maua ia agavaa e mafai ai ona avea o ia o se tagata palota, ia ma se tagata tauva mo le tofi faipule.

O le faamalamalamaga lena ma le faasaoga faamolemole lau Afioga.

**FOFOGA FETALAI:** Malo faafetai.

**Tofa Lealailepule Rimoni Aiafi:** Lau Afioga i le Fofoga Fetalai, leai o lea ua ou maua, faafetai i lau Afioga i le Tamaitai Minisita.

**FOFOGA FETALAI:** Malie le sui usufono mo Faleata Sisifo, o lea ua ou faamalu atu, malie lau Afioga i le sui usufono mamalu, o lea ua manino ma malamalamala le mea lea sa e atugalu i ai. O lea ua malamalamala le folasaga a le Tamaitai Minisita, o lea foi sa ou taumafai atu e faamalamalamala le mataupu. O lea ua tatou avea le avanoa e aua ai ne i o tatou tuulafoaia i latou sa i le Lola lea, fai la e le tagata lana faaiuga pei ona saunoa le sui usufono mamalu mo Palauli le Falefa, you make your own decision, on your own right to vote, pe e te toe foi mai i i for the last time, last time, e le toe faia e uma loa, uma loa. Ona faasolo laia o le faatulagaga po o le a le faaiuga o le a tatou agai i ai i le aso, faamalamu boundaries, ona pule lea o le tagata, po o lona residency, ia po o le sau lea i i. E manatu e manino o le a leí ..

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**Tofa Lealailepule Rimoni Aiafi:** Lau Afioga e faamalulu atu lava i lau Afioga, e tasi lava le fesili lea e tau faamanino, e fia la Lola lea o le a fai ai palota taitoatasi?

**FOFOGA FATALAI:** E tasi le Lola. O le Lola tuai lea o le a faamamalu, one Roll, o le Lola tuai lea o le a faamamalu pe a maea nei ona faaulufale le Urban Seats, a o le taimi lenei, o lea e tatou te i luga i le Independent Seats. E le i pasia le tatou Tulafono e fesuiai aloaia ai mea.

**Tofa Lealailepule Rimoni Aiafi:** Lau Afioga e faamalulu atu, e lua Lola a le Urban Seats, o le Urban West ma le Urban East.

**FOFOGA FATALAI:** Ia e lua itumalo mavae lea o le a fai ai ae tasi lava le Lola, ona mavaevae laia o palota i itumalo o le a mavaevae i ai tulaga o le aso.

Le sui usufono mo Faleata Sisifo ua malamalama le mataupu?

**Tofa Lealailepule Rimoni Aiafi:** E faamalulu i lau Afioga, o lea la ua matua confusion atoa le mea. O lea sa feoloolo le mea sa i ai, a o le mea lea ua e matuui faasese atoa le mea lea, e faamalulu atu.

**FOFOGA FATALAI:** Leala, you have to obey the Speaker. Alaala i lalo o lea ua manino le mataupu, Palu, e te disobey foi oe o le aí ..

Ia se i tulai mai lau Afioga i le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fatalai, o le matua tele o le nunumi o le mea ua i ai nei. O ai e mafua ai, o ai e mafua ai le nunumi o le aumai o tatou Tulafono i inei, e le gata o le tou fetotoai o lena itu, a o lenei e tuufesili atu lenei itu. O lou talitonuga o le Tulafono lenei, ua mafua lava ona fetotoai o le aumaiga o le Tulafono e lau Afioga i le Palemia ma le Minisita lea ua fetotoai, e le gata o le fetotoai o lena itu, a o lea e tuufesili atu le itu lenei, ina ia fai le mea talafeagai ae aua leí ..Afaí ua fou ia nofoa, e tatau ona silasila i le Lola ia fai le mea amiontonu, ae le o le fai o na mea o transition ea po o a ea?

**FOFOGA FATALAI:** Se i ou faamalamalama atu le mataupu lea.

**Afioga Hon Palusalue Faapo II:** Ma o le mea e fia faasao lau Afioga, e le i ai se iuga a le tatou Komiti, a mea e tuu le avanoa i mea ia, e eseese ai la tatou.

**FOFOGA FATALAI:** E faamalulu atu i lau Afioga i le Taitai o le Itu Agai, o le a le tulituliaupu le mea lea, aua a ou tapa nei e aumai Hansard o le tatou Fono ona iloa lea o le mea lea na oo i ai le tatou talanoaga.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

Ia outou finagalo malilie, na ala ona lagalaga le mataupu, o le saunoaga a le sui usufono mo Faleata Sisifo lea na tee ai le finagalo o se tasi o sui usufono mo le Palota Taitoatasi, Afioga Maualaivao Pat Ah Him, o lea ou te faasaoa o lea foi ua saunoa mai ia, ia o ai ia o le aí ..? Ua uma le tatou fasiga gata na fai i le falefono tuai, a o lea se i silasila tuu pea le avanoa se i tatou oo i le fesuiaiga, tuu ia le transition ona o lena e tou te le fiafia i le transition, le fesuiaiga o le a pasi ai le Lola a palota taitoatasi i le palota tu taulaga. Ae silasila outou i le avanoa lea e ave, filifili le tagata la e i Aleisa po o fea e alu i ai, decide, pe nofo i o, alu ifo i le sui usufono mo Sagaga le Falefa e palota ai, pe sau i i le mea lea e i ai nisi o sui usufono mo Palota Taitoatasi, Afioga Maualaivao Pat Ah Him ma Papaliitele Niko Lee Hang, ona malamalama lea, ua iu le mataupu.

Tulai mai se tasi o sui usufono mo le Palota Taitoatasi, Susuga Hon Papaliitele Niko Lee Hang.

**Susuga Hon PAPALIITELE NIKO LEE HANG (Palota Taitoatasi):** Ia faafetai atu i lau Afioga i le Fofoga Fetalai mo le avanoa, ia e le fia gugu foi Sakaria ona o lea e aafia lou nei sui usufono ona o le aafiaga o lo o i ai maua nofoa ma le Afioga Maualaivao Pat Ah Him.

Ae na ona ou tulai atu lau Afioga i le Fofoga Fetalai e toe faamanatu atu i saunoaga ia e tulai mai e faapea, o lea ua talatalanoa eligibilities o leí í a o le mea lea ou te talitonu e tatau ona talanoa nei o mea ia o boundaries ia ma pasia loa le tatou Tulafono. O le tulaga foi lea e fesiligia ai e lua Lola, e sese lea mau, o lea lava e le i pasia le Tulafono e taatia mai le Urban Seat i lona tulaga aloaia, o le taimi nei na o le Individual Vote Rolls vaeane leí í se i vagana la ua pasia nei le Tulafono, ia ona tasi loa lea o le Lola o le a transfer tagata ia i le Lola o le Taulaga, leaga o lea e faafogafoga mai le mamaulu o le Au Palota Taitoatasi, o lea e confuse foi latou i le tulaga lea e i ai maua itumalo, ia na faamalulu i ai e onosai mai, o nei lava e pasia ai le Tulafono, ia ona maua loa lea o le tonu ma le sao o le mea e agai i ai. O le saunoaga foi lea a le Afioga i le sui usufono mo Palauli le Falefa i le Tulafono, o la e tumau lava le tatou Tulafono tuai, e tolu lava tausaga e tatau ona sau ai le tagata mai fafo e alaala i inei faatoa mafai ona alu i le palota, a o le avanoa lea e tuu mai i leí í e ese, o tagata ua leva ona i inei a o le 6 masina e nofo ai i se fanua umia saoloto, ia ona agavaa lea. O le eseesega lena lau Afioga, ma lou faaaloalo lava.

**FOFOGA FETALAI:** Malo faafetai fesoasoani mai ua atili ai ona malamalama le mataupu.

**Afioga Maualaivao Pat Ah Him:** Lau Afioga i le Fofoga Fetalaií ..

**FOFOGA FETALAI:** Ia se tasi o sui usufono mo le Palota Taitoatasi, Afioga Maualaivao Pat Ah Him, pe i ai se isi mea?

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**Afioga Maualaivao Pat Ah Him:** Ioe na o sina mea laititi lava.

**FOFOGA FETALAI:** Ia, e avatu pea le avanoa o le ava tele atu, tulai mai.

**Afioga Maualaivao Pat Ah Him:** Leai, ona o lou lagona o lo o faafogafoga mai ia itumalo nei tai pei o Aele, Aleisa ma nisi o nuu o lo o toatele ai leí ..ua saunoa lau Afioga e tauvalaau atu, ia pule outou, ia a o le gagana lena lea sa matou avea i ai. A o lea o le a ou faamatala i ai latou, tutumau pea, o lea lava e tatou te o lava i luga o le vaa. Ioe, ma le faaaloalo lava, faafetai.

**FOFOGA FETALAI:** Ia.

**Tofa Motuopuaa Uifagasa Aisoli Vaai (Vaisigano Nu. 2):** Lau Afioga i le Fofoga Fetalaií ..

**FOFOGA FETALAI:** Ia se i tulai mai le sui usufono mo Vaisigano Nu. 2.

**Tofa MOTUOPUAA UIFAGASA AISOLI VAAI:** Ia faafetai mo le avanoa i lau Afioga. Sa ou fia tautala foi i le mea lea na finau ai le sui usufono mo Faleata Sisifo, ia ae tuu ia, ou te iloa lava e sao le sui usufono mo Faleata Sisifo, ia ui i lea, ia o le a fai atu ia lauí na o sina tamai fesili lava.

**FOFOGA FETALAI:** Ia saunoa le sui usufono mamalu.

**Tofa MOTUOPUAA UIFAGASA AISOLI VAAI:** O mea nei o Tulafono, e fai e tatou Tulafono, ae a o atu i taimi e fai faamasinoga i totonu o faamasinoga, ia ona taaalo loa lea o Loia e faauiga upu. Pei la o le mea lea o lea e fesili atu ai i le Taitaifono, o le mea lea o le Residence on Freehold Land, aua e mafai lava ona alu atu le isi faapea, ia o le a ou alu moni i i i Faleata East i le Urban po o Faleata West, ae o le a ou alu ou te nofo i se hotel e mau totogi ai i se 6 masina on Freehold Land, ua e vaai la i ai i leí a? E le o mafaufau lava i ai le Komiti i nei mea, ae a oo ina oo i totonu o Tulafono ma sau le candidate ia ona alu lea o le isi sue. O le mea lea lau Afioga i le Taitaifono, o le residence la lea on your freehold land, o lou lava fanua po o se fanua o se isi, pe e te alu atu foi e te nofo i sou aiga o nofo i luga o le freehold land, o mea faapena?

Ma lau fesili mulimuli, o la outou Lipoti, o lea ou te vaai atu na o Maualaivao lava e le o saini i la outou Lipoti, pe i ai se auala ua le saini ai Maualaivao i la outou Lipoti. Ma le faaaloalo.

**FOFOGA FETALAI:** Ia Mr Chairman, tulai mai lau Afioga.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**Afioga Hon LEAUEPE TOLEAFOA APULU FAAFISI:** Masalo e suifefilo i le malie o finagalo faaalia. Ia ou te faamalulu atu foi i lau Afioga i le Fofoga Fetalai, e tau ma se toa ma lau Afioga, o avanoa lava nei sa tuuina atu i le Komiti, ia sa faapea ai e autovaa atu i ai sui usufono mamalu o le Palemene e fetufaaai ai ma faamalamalama itu uma ia, ae ui i lea, ia ou te faamalosiau i le tofa i lau Afioga, ona e atagia i finagalo o sui usufono, e toso mai le Tulafono i le mea la e manatu ia e faaliliu ai e tusa ai o lona manao. Ia ailogia o se faiga amiotonu lea tulaga, ioe, o le finagalo lava lea o le tagata a usufono lava ia le sui faipule, ae le faapea o le a taai faafala ai le tapenaga a le Malo ma tapenaga a Matagaluega o la e fitoitonu i ai le tomai faapitoa i le faatinoga o galuega nei, ia ona aumai lea o le manatu faa-faipule e manao ia taai ia ioe mai lau Afioga o le mea lena e sao.

A o lea mea pei ona saunoa mai le sui usufono mo Vaisigano Nu. 2, ia e leai e fai foi o le tagata umia saoloto le fanua, ae i ai foi le isi ituaiga lisi foi lea e lease to own, e nofo i le lease foi lele o la e mativa, se i i ai se tupe ona maua lea, ia e uso uma lava mea na, e alu alu lava liu eleele tumaoti. Ia pei e faapena tuu le avanoa i nai o tatou tagata foi lelefí ..ae 25 tausaga talu ai, a o faafofoga mai Samoa, lau Afioga i le Fofoga Fetalai, masalo pe na o se toaí ..e le toatele ni tagata sa latou umia ni fanua, e leai, sa tele lava i le aumaumea, ioe, ae a aso nei? Ua faamatuu atu e le Malo ana eleele e fia selau afe eka. O le a le mea la ua i ai? O la ua tofu eleele Samoa. Aisea? Atinae a le Malo, faamatuu e le Malo ia tutusa le soifua lelei o le tagata. O le mea lena e tatou te fuafua, e le na o tatou nei, e tatou te le faavavau ai i i, ae mo le lumanai. Ia o le tali atu lea, faafetai.

**FOFOGA FETALAI:** Malo. Iaí ..

**Tofa MOTUOPUAA UIFAGASA AISOLI VAAI:** Lau Afioga i le Fofoga Fetalai, o lau fesili na ou fia malamalama, aua o mo technical issues lea ou te alu atu ai, ia a o lea ua saunoa i eleele e fia selau afe, ia na ta apply foi ta ita i ni eleele o si o ta nuu, ia e leai lava se mea na maua, ma le faaaloalo.

**FOFOGA FETALAI:** Malo. O lea tatou te i le vaa lava lea e tasi e le na o lau Afioga, ae le uma le fai aso o le Alii, o la o le a vaevae Tanumalala ma isi nuu na, ona tali laia o lagi o Aopo.

**Afioga Tufuga Gafoaleata Faitua (Vaisigano Nu. 1):** Lau Afioga i le Fofoga Fetalaií ..

**FOFOGA FETALAI:** Malie le sui usufono mamaluí ..

**Afioga Tufuga Gafoaleata Faitua:** E fia fesili i leí .O le Lipoti a le Komiti e fia fesili ai faamolemole i le vaega lea 3.2 ae le ií .o leí .

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**FOFOGA FETALAI:** Ua oo i le mea lena le sui usufono mo Vaisigano Nu. 1?

**Afioga Tufuga Gafoaleata Faitua:** Leai o le mea lea e sau ai ou te fia fesili ai, fai mai o le sailiiliga a le Komiti, ua maitauina ai le talafeagai o le taimi e pei ona faatulagaina ona vaaií .

**FOFOGA FETALAI:** Ou te faamalulu atu i le sui usufono mamalu mo Vaisigano Nu. 1, o lea ua eí .

**Afioga Tufuga Gafoaleata Faitua:** Agavaa ai e lesitala ma tauva i le itumalo, e 6 masina.

**FOFOGA FETALAI:** Malie lau Afioga i le sui usufono mamalu o lea ua pasia le tatou lafo, e faamalulu atu ai ua tautuaupega lou fesili mai o lea uaí .e le mafai ona toe foi i tua le tatou galuega.

*Faamaonia le Teuteuga.*

*Faamaonia le Fuaiupu 3 e pei ona Teuteuina.*

**FUAIUPU 4: Ua teuteuina le fuaiupu 45A.**

*Faamaonia.*

**FUAIUPU 5: Ua teuteuina le Tulafono o Itumalo Faa-Alaalaafaga.**

**FOFOGA FETALAI:** O lo o i ai le Teuteuga a le Komiti i le Fuaiupu 5. Tulai mai lau Afioga i le Taitaifono.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te faatu le Teuteuga i le Fuaiupu 5 e faapea:

**“TEUTEUGA:**

**5. Ua teuteuina le Tulafono o Itumalo Faa-Alaalaafaga-** I totonu o le Faamatatalaga i le Tulafono o Itumalo Faa-Alaalaafaga 1963, mo le Vaega 2, e faapea:

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**“VAEGA 2- TUAOI MO ITUMALO O NUU I LE  
 TAULAGA ITUMALO O NUU I LE TAULAGA I  
 SASAE**

*O le vaega eleele uma (e ese mai ai i lo fanua faaleaganuu)  
 lea o lo o aofia i tuaoi e faapenei:*

**E amata mai i le laina o lo o tuaoi ai Vaimauga i Sasae  
 ma Anoamaa i Sisifo seia oo mai i le laina o lo o tuaoi ai  
 Vaimauga i Sisifo ma Paleata i Sasae.**

**ITUMALO O NUU I LE TAULAGA I SISIFO**  
*O le vaega eleele uma (e ese mai ai i lo fanua faaleaganuu)  
 lea o lo o aofia i tuaoi e faapenei:*

**E amata mai i le laina e tuaoi ai Vaimauga i Sisifo ma  
 Paleata i Sasae, seia oo atu i le laina o lo o tuaoi ai Paleata  
 i Sisifo ma Sagaga le Palefa.”**

Ma lou faaaloalo.

**FOFOGA FETALAI:** Ia se i tulai mai lau Afioga i le Minisita mo Faamasinoga ma Pulega tau Faamasinoga.

**Afioga Hon FIAME NAOMI MATAAFA:** Lau Afioga i le Fofoga Fetalai, atonu o le Fuaiupu tonu lea sa ou tulai atu ai i le amataga o le faataatia mai o le Lipoti a le Komiti, ma ou faatalosagaina ai ina ia noatia se faaiuga a le Maota i le fai lea fuafua i le iloiloga o le Lipoti e le Fono Aoao.

Ma e ou te manatu o lea ua faatino ia le Iloiloga, ma e ou te tautala i ai ona o le Fuaiupu lea, na o le pau lava lea o le Fuaiupu lea o lo o i ai le toa i le faagasologa o le tatou Tulafono. Ma ou te faafetai atu i le Komiti i le faavavevave ma le tali mai i le mau na tuuina atu a le Maota e toe foi mai le latou Lipoti i le tatou Fonotaga lenei.

Lau Afioga i le Fofoga Fetalai, atonu la o lea ua tatou manino i le toa lea tatou te i ai, aua o le Tulafono o lo o faatulaga atu, o lo o tuua ai a tatou tuaoi o itumalo tu taulaga i luga o tuaoi faaitumalo mavae po o Itumalo Faa-Alaalafaga o le Vaimauga Sisifo ma Paleata Sasae. O le finagalo o le Komiti o lea ua faaalia i le latou Lipoti ua tala atu i tua ia tuaoi ia, o lona uiga, o le tasi o itumalo o tu taulaga o le a aofia ai ia Itumalo Faa-Alaalafaga, o le Vaimauga Sasae ma le Vaimauga Sisifo, tasi lena itumalo tu taulaga, ia o le isi itumalo tu taulaga o le a i ai Paleata Sasae ma Paleata Sisifo.

Lau Afioga i le Fofoga Fetalai, o lea sa ou tulai atu i le Teuteuga o le Fuaiupu e 3, ma e faamanino atu sa uia lava ala o mea ma tulaga masani i le toe Teuteuga ua aumai ai i le tatou Tulafono lenei, ma e na pasia foi e le Kapaneta ma ua auaufaatasi i ai ia se finagalo ma le Komiti.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

Ae peitai, o lea ua maitauina i le Lipoti lenei a le Komiti, ia ma e faamalulu atu ai o lea sa fai sina faitau faatopetope aua o le Lipoti atoa lea faatoa faataatia ananei i le taeao, ia ma ia malie foi lau Afioga i le Fofoga Fatalai ma le mammal o le Palemene, a umi foi sa matou faamatalaga, ia e ao ina umi ona o lea lava ua taatia mai le finagalo o le Komiti, ae ao foi ona fola atu le faamoemoe o le Malo sa faataatia atu ai le tatou Tulafono.

Lau Afioga i le Fofoga Fatalai, o le faagasologa lenei o le Toe Teuteuga lona lua, o le soosoo mai lava lea ma le Teuteuga muamua ua uma ona tatou pasia. Ia ma i lau Afioga i le Fofoga Fatalai, ou te le fia faia se faamatalaga e toe lagalaga ai foi finagalo o le Maota ia pe toatamai ai foi lau Afioga i le Fofoga Fatalai, aua o lea sa i ai pefea i le tapenaga foi a le Komiti sa aumai muamua i ai ia lenei Tulafono, lea sa Taitafono ai lau Afioga i le Fofoga Fatalai. E i ai foi i totonus o le Komiti lea a le tatou Palemene, ia le Sui Fofoga Fatalai, le Afioga i le Palemia, le Taitai o le Itu Agai, ia ma isi sui usufono o le Palemene. Ia o lea lava sa manino nisi o feteneaiga o aia sa tulai mai ia ma sa saunoa ai foi le Taitai o le Malo e tulai ese mai ia, ona e faigata o le Tulafono e tapena mai e le Kapaneta, ae peitai, ia o lea o lo o saofai ai ia i totonus o le Komiti lea. Ma o lea sa tofi mai i ai isi Minisita o le Kapaneta mai lea taimi i lea taimi e fesoasoani i le tatou Komiti.

Lau Afioga i le Fofoga Fatalai, sa i ai foi le tatou feeseseaiga ona o Teuteuga a le Komiti, ma e ou te fia tautala i le auala e fai ai a tatou Teuteuga. O le tatou Tulafono Tumau e tuuina atu ai ia tatou Tulafono po o tatou Lipoti a tatou Komiti, o lea o lo o faapea mai le tatou Tulafono Standing Orders, e i ai i le Komiti le power na te faaalia ai sona taofi.

Lau Afioga i le Fofoga Fatalai, e le o le aumaia o le Toe Teuteuga Tusitusia Faaletulafono o le Text, o le Draft o le Tulafono, e le o le aumaia o le mea lena a le Komiti e faaali ai lo latou taofi, aua o le tusia o tatou Tulafono, o le matafaioi lena a le Loia Sili ma aumai i luma o le Kapaneta ma faapena ona faasolo mai ai a tatou Tulafono i luma o le Palemene.

O le mea la lena o lea ou te talosaga atu ai lau Afioga i ala o mea ma a tatou Teuteuga, aua o lea ua taatia mai i le Lipoti a le Komiti se Teuteuga ua foliga mai o se Draft Bill, ae peitai, e le o se Teuteuga lea na uia ala masani e avatu i le Kapaneta ma toe faafoi mai ai ma tusitusia e le Loia Sili a tatou Tulafono, o le ala lena o mea. Ae i le tino lava o le Toe Teuteuga o lo o aumai, o faaupuga o lo o i ai, e le o talafeagai faaletulafono, le talafeagai faaletulafono ia tuaoi ia o lo o tusi mai ai i i. Aua o le tosiina o laina e pei ona aumai i le Toe Teuteuga lea, o laina i luga o pepa. Ae peitai, e pei foi ona aumai ia Toe Teuteuga e le Malo o tuaoi o itumalo tu taulaga o lo o faailoga mai ai lava ia pine po o nofoaga faapitoa e mafai ona faasolo ai ia le faailogaina o itumalo tu taulaga.

**Afioga Hon Palusalue Faapo II:** Lau Afioga i le Fofoga Fatalai, o se mea e fia malamalama.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**FOFOGA FETALAI:** Malie lau Afioga i le Taitai o le Itu Agai, se i maea mai ona ou avatua lea o le avanoa.

**Afioga Hon FIAME NAOMI MATAAFA:** Lau Afiogaí ..

**FOFOGA FETALAI:** Saunoa, saunoa oe se i uma ona avatu lea o le finagalo o leí ..

**Afioga Hon FIAME NAOMI MATAAFA:** Faafetai lava i lau Afioga.

**Afioga Hon Palusalue Faapo II:** Lau Afioga leaga o le mea e fia faamalamalama ai, leaga o lea o le a pasi ese ai le saunoaga a le Minisita.

**FOFOGA FETALAI:** Leai, aua e te popole ou te avatua le avanoa i le mea lea e te atugalu mai ai, o le a avatu le avanoa Palu.

**Afioga Hon FIAME NAOMI MATAAFA:** Ia, o le itu lea e tatalo atu ai i lau Afioga ma le mamalu o le tatou Palemene o le tatou uia o ala o mea tatou te tuliloa ai le amiontu. E le paoina e le Tulafono se finagalo o le Komiti a ua i ai se finagalo o le Komiti latou te teena le Tulafono lea ua faataatia atu, aumai la, afai e lagolagoina e le Palemene ona faapena lea ona tatou fai ae tusi lava e le Loia Sili e ala i le faatonuga a le Malo, po o le avatu foi o le mau a le Palemene i le tatou Tulafono. E le mafai ona esesese tagata e tusia a tatou Tulafono, aemaise pe a faapea o se Tulafono na amatamea mai ai lava le tatou Faigamalo.

Lau Afioga i le Fofoga Fetalai o lau fiaitau faavavevave atu i le Lipoti a le Komiti o lea e faapea o le mamafa o molimau na oo mai i luma o le Komiti sa lagolagoina le tatala atu i tua faatele ia tuaoi o itumalo ia. Ma i lau vaai atu i ai i le faagasologa mai o molimau o lea lava o lo o aumai pe se 30+, a le o ni savali taitoatasi, o savali e avea ma sui o se nuu po o se itumalo. Ma lau Afioga i le Fofoga Fetalai, e leai se agaga o au nei e ou le Tulafono o lo o faagasolo e faapea e tauleagaina le mau o lo o aumai. Ae o lea ou te matauina i le Lipoti, muamua, o le mamafa o mau na aumai.

Lona lua, ua tauave e le Komiti se mau e faapea ua i ai faamaumauga a le Malo e pine ai pe faauigaina ai le upu lenei o le tu taulaga po o le urban ma latou tauaveina ai le pepa o faiga faavae a le Matagaluega o le PUMA. O lea e silafia uma e tatou o le PUMA lea e feagai ma le fuafuaina o atinae a le tatou atunuu.

Lau Afioga i le Fofoga Fetalai e le faoa e le Tulafono o Faiga Palota o lo o faataatia atu, fuafuaga alualu i luma a le Malo mo le atinae. E leai, aua o fuafuaga alualu i luma pei ona faataatia mai i le faiga faavae lea a le PUMA ua aumai e le Komiti e mafai lava ona amata atu nei, taeao, tausaga lea, le tausaga atu i ona tua, le lima tausaga, le sefulu tausaga. Lau Afioga i le Fofoga Fetalai ma le mamalu o le Palemene, o le tatou palota e fai ia Mati o le tausaga fou.

**26 ME 2015**

### **Lafo mo le Faaauauina o Itula Fono**

**FOFOGA FETALAI:** Ou te vaelupeina le saunoaga a le Minisita ona ua tatou taunu i le tatou taimi malolo. O le a tatou alo e fai le malutaeao ona tatou toe taliu mai lea faaauau le tatou Fonotaga.

Ou te faasilasila atu o le a faataatia ese Taualumaga a le Fono Aoao mo lana malologa masani o le taeao.

*Na faataatia ese Taualumaga a le Fono Aoao mo lana malologa masani i le itula e 10:45 i le taeao ma toe faaauau i le itula e 11:27.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoao Faitulafono. E i ai le agaga mauluga ua tatou taunu mai i le tatou Vaega lona lua o le Fonotaga i lenei vaega o le aso. Ae talitonu le faamoemoe ua maea le taligasua ma le malu taeao ma e i ai le talitonuga ua faafoisia le malosi i le tino, le agaga ma le mafaufau e faaauau ai le tatou galuega, o lea ua maea ona faatulaga i lenei aso. E momoli atu ai le faafetai tele i le paia ma le mamalu o le tatou Maota i le lavapapale, aemaise foi o le faatulagaga o a tatou polokalame e pei ona fuafuaina.

E faia le tatou malologa o lo o saunoa le Afioga i le Tamaitai Minisita mo Faamasinoga ma Pulega tau Faamasinoga. Ae ou te le i avatua le avanoa, ou te tapa le Afioga i le Palemia mo le lafo mo le fetuunaiga o tatou taimi o le tatou Galuega. Ma lou faaaloalo lava.

### **LAFO MO LE FAAAUAUINA O ITULA FONO**

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ua sao i alo le faasiliga malosi o le tatou Maota nei ma ua maua foi le malosi faafouina e toe faaauau ai a tatou galuega. A ua ou tu atu lau Afioga e faatu le lafo, *Ina ia faaauau le tatou Fonotaga seja maea ona faia le tatou lauga pe a maea mea ia, ona fai ai lea o le tatou Lauga o le Tala o le Tupe, si tamai tala lava o le Tupe ai na o se lua minute.*

*Faaluaina e le Sui Palemia.*

*Na faamaonia le lafo.*

*Na toe faaauau fefafolafoaiga i luga o le iloiloga auiliili o le Tulafono Tau Faaofi o Teuteuga o le Tulafono Tau Faaofi o Faiga Palota (Nu.2) 2015.*

**FOFOGA FETALAI:** Lau Afioga i le Tamaitai Minisita, ou te manatu o lea ua taatia i le Maota lau saunoaga ma lau tuleiga. Na pau lava lea o le tatalo a le Fofoga Fetalai.

26 ME 2015

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

Ou te talitonu o lea ua maea i fatia ua sola ma le taimi ua alu le faatulai mai o lenei Tulafono Tau Faaofi ua talatala ma le la foi lou finagalo. E manatu foi ua maea ona tatou asa ia ogasami ua folasia i malae le tau faamalamalamaina o le finagalo o le Matagaluega ma lau Afioga i le Tamaitai Minisita.

O lenei la taeao, ou te manatu o lea ua saunoa le Afioga i le Taitaifono, o le Komiti sa faaiugafonoina e le Palemene e faia le latou galuega ma tulai mai le latou teuteuga i lenei taeao. Ona ou lagona lea ne i meaane ua toe agai e toe toso le laau felefele i le tulaga ua maea ona tatou faafogafoga foi i ai i le taimi ua sola, ae ava tele atu i lau Afioga i le Tamaitai Minisita, ona o le mau a lau Afioga ma le Matagaluega, o lea e tau faapulapula mai le mafuaaga na ala ai ona aumai le aiaiga o le Tulafono Tau Faaofi lea ua toe teuteu atu e le Taitaifono ma lana Komiti. A o le agaga, e tatalo atu o lea ua e faafofoga mai o lea ua faaopoopo a tatou Tulafono, ona o le manumanuga i le tatou taimi. O le talosaga a le Fofoga Fetalai, na ona lafo atu pea o le avanoa e faaaaua mai ai le folasaga a lau Afioga, ae ou te maitau ua manino ma malamalama le Maota i le aano moni o le agaga o le Minisita ma le Matagaluega na tuuina mai ai le agaga o le Tulafono Tau Faaofi. Ae tatalo atu i le Minisita, o le tatou taimi lea ou te tatalo atu ai.

Ia se i tulai mai le Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, sa ou taumafai atu lava analieila, ae ua pai le Afioga i le Minisita i le tulaga i le Lipoti lenei a le Komiti na saunoa ai faapea o mea o draft mea nei, a o le tausiga o le mamalu o le Palemene lea e tulai atu ai. O Komiti nei ma a latou Lipoti, e fua i le omai a le atunuu e molimau ai, ma o le process lea e saunoa i ai le Minisita e uma toe ave i le Kapaneta, ia e faailoga fesili foi i lou taofi lea mea. O le mea lea lau Afioga, o le tausiga o le mamalu, o le a la le aoga o le Komiti lenei a le Palemene, pe afai e fua le Lipoti ma le fautuaga a le Komiti i molimau a le atunuu. O le Lipoti lenei ma le Tulafono a le Tamaitai Minisita, ua faalua ona lauiliuina e Komiti Faa-Palemene, ua faalua ona lauiliuina ma le fautuaga a le Komisi Suesue o Faiga Palota. A o lea lava e aumai e foliga mai o lo o finau manumalo lava le Afioga i le Minisita e tusa ai ma le Teuteuga lea ua aumai ina ia pasia. O le mea lea lau Afioga, ia e tausi le mamalu o le Palemene ma ana Komiti, o le mea lea ua ou tulai atu ai. E le o ni draft mea ia e aumai, o fautuaga a le Komiti e tusa ai ma latou suesuega. Ma le isi mea, o le Palemene, o le Palemene o latou e pasia Tulafono ma mea nei. O le mea lea lau Afioga i le Fofoga Fetalai ua ou soso atu ai i le Tamaitai Minisita, ina ia silasila i ai i le itu lea.

**FOFOGA FETALAI:** O lea ua maua atu lau Afioga i le Taitai o le Itu Agai. O lea ua maua lou finagalo le Taitai o le Itu Agai.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**Afioga Hon PALUSALUE FAAPO II:** Ma le isi mea o le Palemene, o le Palemene o latou e pasia Tulafono ma mea nei. O le mea lea lau Afioga i le Fofoga Fetalai e fesoasoani atu ai i le Tamaitai Minisita ina ia silasila i ai i le itu lea.

**FOFOGA FETALAI:** Palusalue, na ou manatu o le a fai lau folasaga mulimuli pe a maea, na ou manao se i faai mai le saunoaga a le Tamaitai Minisita ona fai foi lea o sau faamalamalamaga i itu uma ia. A o le tatalo lena o lea ua e faafogofa mai ua ou tatalo i le Tamaitai Minisita. E tatou te tatao i le moa o le ala i le finagalo tonu lea e finagalo i ai e aumai le lafo ona faataatia lea i luga o le Laulau a Fono i le tulaga masani. A o le agaga o le tatou toe agai i ai, ou te taliu leaga o lea foi la ua amata ona lagalaga finagalo i le tulaga lea. Lau Afioga i le Taitai o le Itu Agai, ou te faamalulu atu ai, ae tuu atu pea le avanoa i le Tamaitai Minisita o lea ua ou tatalo i ai e faapuupuu mai le aumaiga o le mataupu ia malamalamama le Maota ona aumai ai lea e faatu le tulaga e tatau ona i ai ona tatou faaauau lea. Tulai mai lau Afioga i le Minisita.

**Afioga Hon FIAME NAOMI MATAAFA:** Faafetai lava i lau Afioga i le Fofoga Fetalai, ua matu foi fau i le taliga o le sua i le Maota. Faafetai i le Failautusi ma le Ofisa mo le tapenaga matagofie aua le soifua maloloina o sui usufono.

Lau Afioga tatou te malolo ua oo atu lau faamatalaga i le faauigaina o le upu tu taulaga po o le urban. Ma o lea e eseese le faauigaina ma le faamauina o uiga o upu ia e lua. Ua tauaveina la e le Komiti le mau o lo o tuuina mai e le Matagaluega o le Siosiomaga, le MNRE aemaise le itutino lea o le PUMA mo le atiinae, ma ua latou faaaogaina ai le faiga faavae o lo o tuuina mai i fuafuaga ia a le Matagaluega. Ae peitai, o le faaaogaina o upu ia e le Matagaluega o Faiga Palota, o lea o lo o faaaogaina le urban po o le definition o le tu taulaga, lea o lo o faaaogaina e le tatou Ofisa o Faamaumauga, le Statistics. Ma ou te fia faatepa lau Afioga ma le Maota i le Lipoti a le Komiti i le Pepa Faaopoopo Lona Lua, o lo o aumai ai faamaumauga o le Tusigaigoa talu ai nei i le 2011 a le tatou Ofisa o Faamaumauga. Ma o i ina o lo o tau mai ai - urban, Vaimauga West, Faleata East, ona faasolo loa lea o le rural, north west Upolu, west of Upolu, Savaii.

E pei ona faamalamalamaga atu lau Afioga i le Fofoga Fetalai, e leai se agaga o le Ofisa o le Komesina o Faiga Palota e paoina fuafuaga alualu i luma a le Malo e ala atu i le PUMA, aua o le natura lava lena o le atinae. Ma a silasila foi i ai i fuafuaga a le PUMA, o lea e i ai se fua e faapea, e oo atu i le tausaga 2021, ua oo atu le faasologa lea o le tau o le urban agai i Fasitoo, ona mafaufau lea pe o le mea lea o lea lava ua tatou agai atu i ai. Lau Afioga i le Fofoga Fetalai, o le fuafuaga e pei ona faataatia atu....

**Tofa Lealailepule Rimoni Aiafi:** Lau Afioga i le Fofoga Fetalai, e a pe a avatu se faasaoga i le vaega lea ua agai mai i ai le Tamaitai Minisita?

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**FOFOGA FETALAI:** Malie le sui usufono o le ala foi lea na ou tatalo ai i le Taitai o le Itu Agai. Ou te avatua lava le avanoa pe a maea mai, o lea foi ua e faafofoga mai ua ou... ina ne i mea ane ua toso ai le laau felefele i le tatou taimi lea sa ou tatalo atu ai, ae avatu pea le avanoa pe a maea le saunoaga.

**Tofa Lealailepule Rimoni Aiafi:** Ia, thank you. Faafetai lava.

**Afioga Hon FIAME NAOMI MATAAFA:** Lau Afioga, o le fua la lea o tuaoi ua faataatia atu, o se fua lea o lo o talafeagai ma lea foi vaaiga i le mea e tau o le tu taulaga po o le urban. Ma e faaopoopo ma fesoasoani i le galuega a le Ofisa o le Komesina o Faiga Palota, o faamaumauga a le Ofisa o Faamaumauga, e faamatalaina ai mea ia o lo o moomia e le Tulafono lenei, o fea le mea o lo o alaala ai tagata, ae po o fea foi le mea o lo o i ai o latou fanua saoloto lea e tuliloa mo le agavaa o le Tulafono Tau Faaofi lea.

Lau Afioga i le Fofoga Fetalai ma le mamalu o le Palemene, o se amataga o se mea fou, e leai se agaga e faapea ua faatauagavale i isi itu ia o itumalo e pei ona aumai e tuu atu i tua i Faleata Sisifo ma le Vaimauga Sasae, a o le agaga o le Tulafono, ina ia tau maua mai se ata, putiputi mai faamaumauga, ina ia tatou malamalama ai ma mataitupo o fea tonu lava lea e agai i ai le mea lea e tau o le urban ma mea o lo o feoai ai o tatou tagatanuu, aemaise foi o le faatinoina o latou palota, aua o le isi lea tofi taua o le tagata soifua, o le faatino o lana aiatatau e fai ai lana palota mo Faigamalo mai lea vaitau i lea vaitau.

O le faaaogaina foi o le lola o tagata palota taitoatasi, o se ata lea e tau tapue mai ai, pei se indicator mo i tatou, i le mea lea e i ai tagata o lo o nofoia fanua umia saoloto. A tatou tatala atu i tua e pei ona faatulaga mai i le finagalo o le Komiti, o le mea moni lava, tatou te le o mautinoa lelei, muamua, po ua lava a tatou faamaumauga o lo o i ai e fesoasoani e fau ai lola fou nei ona e le i oo i ai faamaumauga a le tatou Ofisa o Faamaumauga i a tatou tusigaigoa talu ai nei.

Ia, lau Afioga i le Fofoga Fetalai, ou te manatu ua faaiuiu atu sa matou faamatalaga, ma o le isi lava tulaga ou te toe faapupula mo i tatou, aua o se faiga fou lea o le a tatou oo atu i ai, pe o le tuaoi pei ona faatulai atu e le Malo po o le tuaoi pei ona finagalo i ai le tatou Komiti, i tua o le palota e faavae i luga o tagata o lo o nonofo i luga o eleele umia saoloto, o le feau e sau ai i tua o le mea lea, o tagata ia ua le toe i lalo o le faamalumaluga e masani ai i le aganuu i le pulega a alii ma faipule. O lona uiga, ua amata ona tatou tuliloa le aia a le tagata taitoatasi, aemaise i lona nofo i luga o lona eleele umia saoloto, o mea ia tatou te vaavaai i ai. Ma atonu o le isi foi itu lea e taua ai le tatou amatamatata laitititi ma tatou mataitupo aua o le mea moni lava, e ui o lea tatou te talanoa i nofoia nei o itumalo tu taulaga, a o lea foi o lo o faapea mai le vaaiga a itumalo mavae po o itumalo faaalaalafaga, lea o lo o fai mai, aumai nisi o matou nofoia faaopoopo. Faleata Sisifo faasolosolo atu i Faleula, ma faapena lava ona faasolosolo atu.

26 ME 2015

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

Ae peitai, e i ai lava le agaga faaeteete aua e maaleale le tafa lea, o le pulega a alii ma faipule, o aiaiga faaleaganuu, ma uiga o lo o tuliloa i le mea lenei o le tagata ua nofo i luga o le fanua umia saoloto. Ma ou te manatu e ao ona tatou auiliili i ai, po o le a le tatou faaiuga e fai i ai i le Tulafono lenei, a pule alofa le Atua tatou te aulia le tausaga fou tulai mai se Malo, ona faapena lea ona tatou auiliili ma vaavaai, po o lelei pea le faavae lea e faavae ai tatou Faiga Palota, po o a tatou tu ma aganuu, po o le mea o le a tatou lilifa atu i le faitauaofai o tagata ma le umia saoloto ma le saolotoga o le tagata o lo o nonofo i luga o eleele umia saoloto. O mea ia e lua tatou te vaavaai i ai, le upega lea na faavae mai ai a tatou Faiga Palota, ae ao lava ia i tatou o lo o faia le filifiliga mai lea taimi i lea taimi ona tatou faia le faaiuga talafeagai.

Lau Afioga i le Fofoga Fetalai, ia, atonu e le toe i ai nisi upu se tele e faaopoopo ua manino le avatuita o le mataupu i le Tulafono Tau Faaofi, o lea foi ua taatia le Lipoti a le tatou Komiti. Ae pei la e fia faaiu atu sau faamatalaga, aua o ita lava lenei e tau faitau lava le Lipoti a le Komiti, e fesili atu e ala atu i le Nofoa i lau Afioga i le Taitaifono a le Komiti, lau Afioga i le sui usufono mo Aana Alofi Nu 1 lau Afioga Leaupepe, o lo o faapea mai le itulau lona 2 a le tou lipoti i lalo o le mataupu e 2 o iloiloga a le Komiti, o le parakalafa lona 2. Ma ou te faitauina e faapea. O le naunautaiga, ina ia aua nei tilofia se taunuuga o iloiloga a le Komiti i nei aafiaga ma atagia ai nisi tulaga, e fesiligia ai le faamaoni o galuega ma le le faaitau o faaiuga a le Komiti. Na faia ai iugafono a le Komiti e faapea " E mafai ona auai sui o le Komiti o lo o aafia i le iloiloina o le Tulafono Tau Faaofi ma faaalia manatu i vaega uma o le Tulafono Tau Faaofi o lo o iloiloina, peitai o le a le mafai ona auai nei sui i le taimi e fai ai le faaiuga a le Komiti i le fuaiupu e 5 o le Tulafono Tau Faaofi. I lau vaai atu lau Afioga i le Taitaifono, a faapea ua vaea i latou o e i ai a latou aia feteenai ona ou faapea lea, ua vaea le toatolu o la outou komiti. O le Afioga ia Maualaivao, o le tofa ia Aveau ma le Afioga ia Tialavea. O le Afioga ia Faimalotoa sa toesea o ia ma sa le auai i Fonotaga a la outou Komiti, o lona uiga a ou fua atu i le faaupuga lea e i ai i totonus o la outou lipoti, e toatolu outou na faia le faaiuga o le lipoti lenei. O lau Afioga i le Taitaifono o le Afioga ia Aeau, ma le Afioga ia Afualo. Ona fesili ane lava lea o lou mafaufau faavalea lau Afioga i le Fofoga Fetalai, o le atoaga lea e moomia ai le numera o se faaiuga e fai, ae po o se mea talafeagai foi. Le fai o se faaiuga e ni tagata se toatolu. Lau Afioga i le Fofoga Fetalai, e lelei lava le tatou malamalam aua o lea na tuu atu le faamoemoe ma le talitonuga faatuatuaga o le Maota o le a faapea ona iloil ma faia faaiuga e le tou komiti. I lou lava manatu, atonu e afaina e a ia aia feteenai o alii faipule, aua o uiga masani o aia feteenai e faailoa, ae le mafai ona taofia ai le fai pea o le faaiuga a le tagata ia i le mea o lo o i ai lona finagalo. Lau Afioga i le Fofoga Fetalai, ua iu le faamatalaga po o fea o le a ave i ai le tofa ma le faautaga a le Maota lenei, ma ua fai foi le tonu a le Vaega Faaupufai lenei ma ua saunoa i ai le matou Taitai. Ua tatala le palota a le mataupu lenei. E palota le sui o le HRPP i le mea o lo o i ai lona finagalo.

26 ME 2015

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

Ma atonu a tatou toe mafaufau i tua, sa i ai foi faitioga i le faaaaogaina o le malosi, o le Vaega faaupufai o lo o tu ai le Malo, ona o lona fuainumera. Ma ia te au lava ia o le sui o le Vaega Faaupufai lenei, e ui o au o le Minisita e ou le Tulafono ua ou talia, po o fea lava le mea e i ai le tofa ma le faautaga a le Maota lenei, tatou faapea ona fai lau Afioga i le Fofoga Fetalai. Ae na o le pau lava le mea ou te tatalo atu ai, i le toe teuteuga lava lea, faamolemole, o le fautuaga ua oo mai ia te au i le tatou Ofisa o le Loia Sili, e le o talafeagai le faaupuga o tuaoi o lo o taatia ai e tusa ma le faatulagaina o le tatou Tulafono o itumalo faaalalafaga. Afai lau Afioga e fai se tatou filifiliga e ala i le palota malo le mau a le Malo i lana Tulafono, faafetai faaauau loa le tatou Tulafono galalue le matou Matagaluega, ae afai o le a faaauau le tatou palota ae malo le mau a le Komiti. O lau talosaga lau Afioga i le Fofoga Fetalai, aumai le finagalo o le Maota e toe tapena lelei mai ai le faaupuga talafeagai o le tuaoi, i faaupuga o le Tulafono, e pei ona taatia ai le tatou Tulafono, o itumalo faaalalafaga. Ona faauma atu ai lea o sa matou tala, faamalulu atu pe a faapea ua i ai se pati ua sala, e leai lava se agaga e faaleaga i se finagalo ua faaalia i lenei Tulafono, aua e malie ai foi ia saunoaga a nisi o sui usufono, e tofu lava le sui usufono ia ma lona lava finagalo. Ao le faamoemoe a le Malo i nofo a Matagaluega e pei ona matou galalue ma tautua ai, e tau sue lava se alavaa tatou te taunu ai i se taunuuga lelei. Ma le faaaloalo lau Afioga i le Fofoga Fetalai.

**FOFOGA FETALAI:** Malo. Faafetai saunoa i lau Afioga i le Minisita. O lea lava sa olo le fua ma tapuai ma faafogafoga i tuleiga ma saunoaga, e ala i lau saunoaga manino o lea ua toe agiga i le Maota i lenei taeao. Sa matou mau iumaea foi ma matou vaavaai ma matau atu, o lea sa e faalele ae o matou matau, tuleiga i lou finagalo, toe faataatia i luma o le Laulau a Fono, ona o le tulai mai o le lipoti a le Komiti filifilia sa faaiugafonoina e le tatou Palemene, latou te toe lauliliuina le mataupu lenei. Ou te faamalulu atu i lau Afioga i le Minisita, o le ala foi lea o lou tatalo atu e faapuupuu mai le saunoaga, leaga ou te manatu ua manino lau folasaga i lenei aso. Tulai mai lau Afioga i le Palemia...

**Susuga Hon TUILAEPAPATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai e le toe tele se upu o lena ua saunoa manino le Minisita o lo o tauaveina le Tulafono a lo tatou Malo. Ma a toe tomanatu i felafolafoaiga a le Palemene i le Tulafono lava lenei aemaise le fuaiupu tonu lava o lea e avea ma to'a o le tatou Tulafono, sa tatau ona pasia le Tulafono lenei i le tatou tauaoifiaga talu ai. Aepeitai ane i le faaooololomaau mai a lo tatou Maota nei ma faapena foi se faaiuga ua taunu ai lenei Vaega Faaupufai. A toe tomanatu, e umi lava se taimi o ou talanoa i le faaaaogaina tatau o le pule, o le power, ona o le Vaega lenei o le Vaega toatele, o lo o mulimulitai i tu ma aga faatemokarasi o lo o fausia ai lo tatou Malo ma Malo uma saoloto faatemokarasi o le lalolagi, under the rule of law. E usitaia ia Tulafono.

26 ME 2015

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

Ma na ou taua ai, o le Vaega lenei o le Vaega e faataua tele le mau ina ia aua nei faaaogaina lona malosi ina ia taomia ai se aiatatau a se vaega toaititi. O le igoa o le Vaega lenei o le Vaega e Puipuia Aia Tatau a Tagata. O le a le uiga o ia upu? E le na o aiatatau a le atunu lautele po o lenei Itu, ae faapena foi ma aiatatau a lena Itu e puipuia, ae soalaupule lava mataupu uma.

O le ala lea na ae ai se manatu o le Vaega nei ina ia toe tuu atu se avanoa e toe ave ai i o i le Komiti e avanoa ai i latou o lo o ese foi le latou faitau. A o le Tulafono lenei na aumai lava e pasi i le tatou Fonotaga talu ai. O lea la ua foi mai le Lipoti a le Komiti, faamalo atu foi i le Taitafono ma le Komiti, e le faigofie le galuega sa faafeagai ma outou, a o uiga ia faa-Palemene, a uma la outou galuega e toe foi mai lava i le Maota lenei. E le o se faatonuga, a o le tuualalo, o le fautuaga, e aumai e fai i ai faaiuga a le Palemene lenei lau Afioga i le Fofoga Fetalai. A maea loa lea ona avea loa lea ma Tulafono. E matua manino lelei le folasaga a le Minisita, o Tulafono o Tulafono a le Malo, e le mafai ona aveesea le aiatatau o le faitau eseese o taofi. E le gata i ina ae faapena foi i inei i lenei foi Vaega. O le tulaga la e pei ona fofogaina ai le Maota, o le tatala o le palota a le Vaega lenei. E lua lava ituaiga palota so o se Palemene lava faatemokarasi, e ui o Faigamalo faatemokalasi e le o ni Faigamalo foi e atoatoa, e tele lava faafitauli, e le faapea e selau pasene ia Faigamalo faatemokarasi, e tele lava faafitauli ma mea faaletonu la e i ai. O le faatemokarasi lea na filifilia ai ia Hitila e avea ma Taitai o Siamani. Na ona pai atu lava i luga faaaoga loa le temokalasi lena e pule faasoloatoa ai faa-Militeli, ia mafai ai ona pule soonafai, na iu ai ina tau le lalolagi lenei. Lau Afioga i le Fofoga Fetalai, na faitau miliona ma miliona tagata na maliliu ai. A o faiga faatemokarasi na oo ai i luga ia Hitila. O lona uiga e le faapea foi e i ai se atoatoa o i ai i faiga faatemokarasi. E pau lona, na o le pau lava lea o ituaiga Faigamalo e sili atu ona laitiiti faafitauli nai lo nisi lava Faigamalo o lo o i ai nei i le lalolagi.

O le mea lea lau Afioga i le Fofoga Fetalai, o lea ua taoto le paega atoa o tulaga na tulai atu ai le Minisita ma avatu i lumamea, ma ua tatala ai foi ma le palota, e le faapea ua tulai mai o se Vaega, po o le a le Vaega ua manumalo, e leai. O le taeao lenei, o le taeao o le aiatatau, faaali lou finagalo i lau faiga palota saoloto, o lea ua tatala. Ia e faapena faiga faatemokarasi faa-Westminister, e i ai le taimi e tatala ai, e i ai foi le taimi e alu ai faa-Vaega, pei foi ona fai talu ai. O le taimi la lenei le tatou Vaega, ia lena, e fai lava lau aiatatau, o lou saolotoga ina ia silafia ai e le atunu, e le i soona faaigoaina le Vaega lenei, o le Vaega e Puipuia Aiatatau a Tagata. E oo foi i lau aiatatau, e tatau foi ona puipuia. Lau Afioga i le Fofoga Fetalai, o le tulaga lena, e le o se manumalo po o le a le finau, o lea ua taoto taiala na faavae ai manatu o le Malo, a o le taimi lenei, o le taimi o le aiatatau.

Lau Afioga i le Fofoga Fetalai, o le toe faaopoopo atu lena.

**FOFOGA FETALAI:** Malo faafetai i lau Afioga i le Palemia.

Tulai mai le Taitai o le Itu Agai.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**Afioga Hon PALUSALUE FAAPO II:** Lau Afioga i le Fofoga Fatalai, faafetai mo le avanoa. E logo i tino lava matagi lelei i le saunoaga a lau Afioga i le Palemia, ae le gata foi i lea o lau Afioga i le Minisita e ou le Tulafono. Ou te manatu lava e le o se faaiuga e faigofie, aemaise lava le tulaga o Malo Faatemokarasi fai Vaega. A o lenei taeao, o lea ua fofoga le Maota aemaise foi o le molimau mai a le Atunu, se ua faamalo le faatoatoa, faafetai o le a le iuga o le Faiga Palota, ua manumalo le Faatemokarasi. E moni lava lau saunoaga lau Afioga i le Palemia, o i ina o lo o i ai le malosiaga, o le power o lo o i ina, a o le Faatemokarasi, o le mea aupito sili lea ona taua e limataitaiina uma ai Palemene a le lalolagi.

O le mea la lea ua ou tulai atu ai e momoli atu le faamalo ma le faafetai ona o le tofa ua ae, e le tupu soo lea mea, aua a oo lava ina tulai mai le Faigamalo e taitaia le atunu, e alu lava i le mea e tele i ai le finagalo, aemaise lava o Tulafono e faataoto mai mo le manua o si o tatou atunu. O le ala lea o lou tulai atu lau Afioga i le Fofoga Fatalai, ona ua manumalo le Faatemokarasi e tusa ai ma le saunoaga manino a lau Afioga i le Palemia ma le saunoaga foi a le Afioga i le Minisita e ou le Tulafono Tau Faaofi. E ui lava ina saunoa le Afioga i le Minisita i le tulaga foi lea pei e foliga o lo o naunau mai, ae i ai lou talitonuga i le mamalu o lenei Palemene, o lea ua saunoa le Palemia, o le aiatatau, o le mea aupito sili lea ona taua. Maumau e pe ana tatou palota uma i a tatou Tulafono uma aemaise o le Teuteuga o le Faavae i le aiatatau. Ae peitai, ia tatou aeae lea manu ua ulu lenei Itu o le Maota, talosia ia saga musuia le Palemia ma le la Itu i teuteuga o lo o faagasolo mai ina ia fai le musumusuga a le Agaga Paia pei o lenei aso. Ia manua tele le tatou Faiga Palota aemaise le Afioga i le Minisita e ana le Tulafono Tau Faaofi.

**FOFOGA FETALAI:** Oi, Papaliitele, se i avatu le avanoa mulimuli lea.

**Susuga Hon PAPALIITELE NIKO LEE HANG:** Faafetai i lau Afioga mo le avanoa .E leai na o se mea e fia malamalama ai lou nei tagata, ona o lea e foliga mai o le a alo atu i le faiga palota, ae i ai nai fesili ia e fia fesiliglia ai le Lipoti faamolemole pe maua i ai se avanoa.

**FOFOGA FETALAI:** O le a le mataupu lea e te saunoa i ai?

**Susuga Hon PAPALIITELE NIKO LEE HANG:** O le mea lava lea o lo o fai i ai le palota lau Afioga, le Fuaiupu 5 lea o le fautuaga a le Komiti.

**FOFOGA FETALAI:** Ia se i saunoa mai le sui usufono, e tuu atu pea le avanoa.

**Susuga Hon PAPALIITELE NIKO LEE HANG:** E muamua lava ona ou faafetai i le Afioga i le Minisita, o lea ua tau malie lava i le faalogologo ua tau manino mai le faasologa o galuega e tatau ona i ai.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

O lea foi la ua faailoa mai e le Ofisa o le Loia Sili le tulaga e lapelapea ai le fautuaga lea a le Komiti. O lau fesili la faamolemole, o lea la o le a fai le palota, pe talia le fautuaga a le Komiti, pe talia le fautuaga a le Minisita e ala mai i le Kapaneta. A o le isi la fesili faamolemole, o lona uiga la o le a toe toloa foi le mataupu ma tuai ai ona fai le lesitala a le matou palota? O le tulaga lena e oo i ai pe a faapea e fai le palota?

Ma le isi, a le talafeagai la ma Tulafono Tumau lea tulaga, ua tatau foi la ona toe oo i tua ma tuai atu ai lava ma le faiga o le galuega a o lea e fia faatope le tatou galuega.

Ma le lua lau Afioga, o le Lipoti lea o molimau ia e aumai, na o le toaluasefuluvalu tagata, le mamalu o le atunu na molimau. A fua la i le faamatalaga a le Komiti e faapea e 90% o le mamalu o le atunu na molimau. A fua la i le faamatalaga a le Komiti e faapea o le 90% o molimau na manaomia le tolo i tua o le palota, ailogia o representative lenei fuainumera e fai e le Komiti se faaiuga faapea e teena ai le finagalo o le Malo lea na aumai i le fautuaga muamua. Ma le lua, na o le tolu lava sui o le Komiti lea na faia le faaiuga pe a tusa ai ma le Lipoti a le Taitaifono, sa le auai sui usufono lea e aafia i le mataupu. O lona uiga la ou te le iloa po o le a le moni ma le faamaoni o nei Lipoti. Ma lou faaaloalo lava.

**FOFOGA FETALAI:** Malo. O lea ua maua lou finagalo lau Afioga Papalii. Se i tulai mai se tasi o sui usufono o le Komiti.

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai mo le avanoa. Ua ou tulai atu ona o se mea e fia faasao. Muamua, e faafetai lava i lau Afioga i le Palemia mo le tofa tatala. Ae ona o lea na saunoa manino lava le Afioga i le Minisita o lea foi ua toe saunoa mai Papaliitele, pei e foliga mai o lea ua lafo mai le uluulu o le laau ia maua ma Aeau, a o le upu moni lava, se sa sasaa faaotia le utu a le faimea, e le i faigofie, e le i momoe foi ae na tatalo i le Alii e fesoasoani mai. O le faaiuga foi lea na fai, e le i faia na o maua, vagana lava Mauala e le i i ai se i tulou. Sa talanoa uma i mea nei, sa matou lotea uma. A ua saili saili, ua oo mai le musumusuga a le Agaga, o le mea e tatau ona i ai. O le iuga foi lea e i i , e le o se iuga a matou, o le iuga sa saili ma le amiotonu ina ia mautinoa e le faia mo i matou nei, e omai tatou toe o, a ia taoto se mea lelei mo le atunu. O le uiga tonu lena, ae ona o lea ua faaoloataua le saunoaga a le Tamaitai Minisita, ia o le agaga lena, e leai se agaga faapena. E le aumaia foi i inei i le Maota ni iugaí

**Afioga Hon Fiame Naomi Mataafa:** O le mea e fia faasao lau Afioga, e le o ni upu a au lea e i totonu o le Lipoti, o upu lava a outou.

**Afioga AFUALO WOOD UTI SALELE:** Leai o lea ua e lafo mai le pua ia matou faapea na o au ma le Afioga ia Aeau ma le Taitaifono lea na faia le faaiuga.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**FOFOGA FETALAI:** Ia, ou te manatu ua manino ma malamalama le mataupu.

**Afioga Hon Fiame Naomi Mataafa:** E le o ni upu a au, o upu lava o le tou Lipoti.

**FOFOGA FETALAI:** Malie lau Afioga i le Minisita o lea o le a ou faauma atua le tatou mataupu ua alu foi le tatou taimi. E i ai se isi mea lau Afioga i le Palemia?

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, se o le mea lena ua ou tulai atu ai, pei ua tau mao ea lau tu lea na ou tu atu ai, o lau fatau ua uma mea uma, toe lava o le palota le mea lea e faatali.

**FOFOGA FETALAI:** Ia, o le ala lena le paia ma le mamalu o le Maota o lea sa tau faavaevae atu se upu a le Fofoga Fetalai. Ae ona o le tulai mai o le Afioga i le Palemia, ua manino ma malamalama ai le isi faalau atoa o lo o tau faapulapula atu. Na pau lava lea o le mea ou te fia afea, leaga e pala maa ae le pala tala, o lea foi e mau faamaumauga a le Maota Fono mo le lumana, ina ne i mau eseese Tutuila ma Ape ona le mautonu lea o le mataupu. O le tatou process, o le matafaioi tonu lava lena a le Palemene e fai. O le fetuunaiga o tatou galuega, e aumai Tulafono a le Malo ona aumai lea i inei i le Maota, ma o le Maota lenei e faia tonu, e leai lava se isi pule i tua atu o le Maota Fono lenei. Po o fea la le mea e agai i ai le tulaga o le faatulagaga o Tulafono, the last word, o le Maota Fono lenei. E pasi loa le Tulafono, ona avea loa lea ma Tulafono, e leai se isi i luga atu. A tatou taunu mai loa i le Maota lenei, o tatou uma o sui usufono, we are all Parliamentarians, ua tatou omai e fai, lipoi upu o le atunu ma fai tatou faiga faavae. O le a foi le naunau mai o Tulafono e tuuina mai, a lea e taatia le aulape o le tatou Fono na uma nei? O lea ua saunoa malamalama le Afioga i le Palemia, e le i faigofie le tatou Fono na uma nei. Na a? Na tali ai, ave i tua le mataupu, se i toe lauiliu le tofa, na ave, ave ave i fea? Fai le tatou faaiuga, ua aveese au. Silasila i ai, aveese au o le Fofoga Fetalai o la e i lalo o le Tulafono Tumau, o le Komiti lea ou te Taitaifono ai ma le Afioga i le Palemia ma le Taitai o le Itu Agai. O le a sau upu na fai i le taimi na tafea ai le lafo na ou aumaia i le Maota lenei, na fofoga e le Afioga i le Sui Fofoga Fetalai? O lea lava e nofonofo ma omiomni ona o le vaai i le nofo filemu o le Maota. O le ala lea o lou toe faamanatu atu, o le process, e tasi lava le tagata e faia le faaiuga o le mea lea o le Fofoga Fetalai, le faasologa o le tatou galuega. Ma e tatau ona ou faamanino le mea lena, e le faia e se loia po o se isi tagata. O lea ua ou tautino atu le mea lea, ma o le faaiuga na fai e le Maota, lea na ou avatua, o le Taitaifono, Toleafoa ma lana Komiti o latou latou te agai e filifili, o le Komiti na filifilia. O lea la ua aumai lo latou finagalo lea ua taatia i le Maota Fono, fai lea o la outou tofa ma la outou faautautaga oo, e saili ai po o fea o taoto ai le amiontonu.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

Ae ou te manumanu ne i faamamasagia a outou Afioga, tou te i ai uma i Komiti faa-Palemene. E le o ni Komiti Tumama po o ni Komitií e leai, o Komiti Filifilia a le Palemene.

O lea la ua tatou taunu mai i le aso, o le ala lea o lou pipii atu lau Afioga i le Minisita, malie lou finagalo, o lea ua tatou matua oo i ooooga o le mataupu lenei, ua tali le Afioga i le Palemia, fai ni ai i le malomaloa o le tatou Fono, toe tatala le avanoa i le atunuu. O lea ua aumai le Tulafono, o le malosiaga atoa na avatu i le Taitaifono ma lana Komiti, e filifili latou. E tasi lava le auga na ala ai ona mafua ona atagia tulaga ia i latou suesuega ma auiliiliga, pule latou. O le faaiuga, lea ua tuuina mai i le latou tapenaga lea ua i luga o Pepa o Galuega. O le ala lea e tatau ona ou faamalamalama tulaga ia ina ia manino ma malamalamalama ne i te i ua tatou o pogisa ona le manino lea o le tatou Fonotaga mo le lumana.

Ae ou te faamalulu atu i le Maota, o lea ua taatia i lagatonu saunoaga ma tuleiga ua saunoa i ai le Minisita, o lea foi ua saunoa le Komiti, ia vaatele i o outou finagalo ne i meaane ua faapea ua faapito manu ia tasi i sa outou faaiuga ua fai. O lea ua uma ona agiga la outou faaiuga, o lea ua taatia o le a fai i ai le tatou tala.

Lau Afioga i le Taitaifono, tulai mai.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai, ou te tulai atu ma le agaga faaaloalo ua malie le faalogologo i le saunoaga a lau Afioga i le Fofoga Fetalai po o le Taitaifono o le Palemene. Ou te faamalulu atu foi i lau Afioga i le Tamaitai Minisita, e leai e le faatauta se lagona ma le finagalo o lau Afioga ma le Matagaluega, e taua foi lou finagalo ma mau pei ona tuuina mai, ae o le matou tiute foi lea e ao ona matou tuuina mai i luma o le Palemene le mea o lo o mafuli i ai tali ma le finagalo o molimau ma le atunuu na o atu matou feiloai. Ma le agaga faaaloalo, faafetai i lau Afioga.

**FOFOGA FETALAI:** O lea ua faataatia le tatou mataupu i lagatonu i le tulituliloa o le amiontonu, ua ou manatu ai o lenei mataupu e tatau ona fai se tatou palota tauvalaau, ia aua ne i atagia se faaiuga e fai e au po o le ioe po o le leai, a ia tutulai mai pea le sui usufono ma lona finagalo ia ogatusa ma le finagalo na saunoa i ai le Palemia.

*Na ta le logo.*

**Afioga Maualaivao Pat Ah Him:** Lau Afioga i le Fofoga Fetalai faamolemoleí .

**FOFOGA FETALAI:** Maualaivao, e i ai ni ou alofa i le tatou mataupu? O le a le mea lea e te fia saunoa mai ai?

26 ME 2015

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

**Afioga Maualaivao Pat Ah Him:** Ioe lau Afioga i le Taitaifono, na o sina mea laitiiti lava lea e le toe siai foi se upu po o se ta e tusa ai ma le tulaga. E faamalulu atu lava i lau Afioga ma le mamalu o le Fono, ona o lea o le a alo i le faiga palota, ae i ai lava si tamai mea laitiiti lea lau Afioga e fia faamanino, ina iaí o le fesili sa sau analailela, po o le a le mea na ou le saini ai i le Lipoti. O le agaga moni lena.

**FOFOGA FETALAI:** Malie Maualaivao ua e faafogofa mai o lea e tau faamatalatala atu, e le o ni ai avea na ou avatua le malosiaga i le Afioga i le Taitaifono, filifili outou, a faalogo atu le tagata e le tatau ona aafia i le faiga o le faaiuga, tulai. O le conflict of interest le issue na mafua ai ona fai a outou faaiuga. E ui i lea, o lea ua ta le tatou logo.

**Afioga Hon Palusalue Faapo II:** Lau Afioga i le Fofoga Fetalai, na o si mea lava lea e faafesili atu ai. Po o fea tonu lava le mea lea o le a fai ai le tatou palota, po o le Lipoti a le Komiti, po o le Teuteuga a le Afioga i le Tamaitai Minisita? Ne i te i ua sese atu ai se isi.

**FOFOGA FETALAI:** Mo le silafia Palusalue e tasi lava le fesili, pe faamaonia le Teuteuga a le Komiti.

**FESILI:** O e finagalo e lagolagoina le Teuteuga a le Komiti i le Fuaiupu 5 tutulai mai.

**PALOTA TAUVALAAU T.T.93(1)**

1. Afioga Hon Tuisugaletaaua Sofara Aveau.
2. Tofa Hon Tolofuaivalelei Falemoe Leiataua.
3. Afioga Hon Le Mamea Lemalu Suā Leatuavao Tuiletufuga Ropati Mualia.
4. Tofa Hon Faamoetauloa Lealaiauloto Ulaitino Faale Tumaalii.
5. Afioga Hon Magele Mauiliu.
6. Afioga Hon Leaupepe Toleafoa Apulu Faafisi.
7. Tofa Hon Tuuu Anasii Leota.
8. Tofa Tapuai Toese Ah Sam.
9. Tofa Tuileutu Alavaa Voi.
10. Susuga Papalii Lio Faavaivaiomanu Taeu Masipau.
11. Afioga Afualo Wood Uti Salele.
12. Tofa Motuopuaa Uifagasa Aisoli Vaai.
13. Afioga Hon Aeau Peniamina Leavaiseeta.
14. Afioga Hon Palusalue Faapo II.
15. Tofa Aveau Tuala Lepale Niko Palamo.
16. Tofa Levaopolo Talatonu.
17. Tofa Lealailepule Rimoni Aiafi.

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

18. Afioga Toeolesulusulu Cedric Pose Salesa Schuster.
19. Afioga Hon Faumuina Tiatia Faaolatane Liuga.
20. Afioga Lafaitele Patrick Leiataualesa.
21. Tofa Faimalotoa Kika Iemaima Stowers.
22. Tofa Tuisa Tasi Patea.
23. Tofa Lenatai Victor Faafoi Tamapua.
24. Tofa Sooalo Mene.
25. Susuga Ifopo Matia Filisi.
26. Afioga Tialavea Fea Tionisio Seigafolava.
27. Tofa Tusa Misi Tupuola.
28. Afioga Tafua Maluelue Tafua.
29. Afioga Hon Gatoloaifaana Amataga Alesana Gidlow.
30. Tofa Agafili Patisela Eteuati Tolovaa.

**IOE – 30**

**FOFOGA FETALAI:** O e teree i le lafo, tutulai mai.

1. Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi.
2. Tofa Hon Fonotoe Nuafesili Pierre Lauofo.
3. Afioga Hon Fiame Naomi Mataafa.
4. Tofa Hon Tuiloma Lameko.
5. Afioga Lautafi Fio Selafi Purcell.
6. Afioga Hon Manualesagalala Mati Tuigamala Enokati Posala.
7. Afioga Hon Sala Fata Lisati Pinati.
8. Tofa Fagaivalu Kenrick Samu.
9. Afioga Tufuga Gafoaleata Faitua.
10. Tofa Alo Fulifuli Taveuveu.
11. Afioga Afoafouvale John Moors.
12. Afioga Taefu Lemi.
13. Afioga Maualai vao Pat Ah Him.
14. Afioga Peseta Vaifou Tevaga.
15. Susuga Seiuli Ueligitone Seiuli.
16. Susuga Hon Papaliitele Niko Lee Hang.

**LEAI – 16**

**FOFOGA FETALAI:** O le iuga lenei o le tatou Palota Tauvalaau, o e na lagolagoina le Teuteuga a le Komiti e 30, o e na teena le Teuteuga a le Komiti e 16. O lea ou te faasilasila ai aloaia, ua talia aloaia le Teuteuga a le Komiti.

*Faamaonia le Teuteuga.*

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 - iloiloga auiliili**

*Faamaonia le Fuaiupu 5 e pei ona Teuteuina.*

**Afioga Hon FIAME NAOMI MATAAFA:** Lau Afioga pe maua se avanoa...

**FOFOGA FETALAI:** Tulai mai lau Afioga i le Minisita.

**Afioga Hon FIAME NAOMI MATAAFA:** Ou te faafetai atu, atonu o lea ua manino le faaiuga o le tatou mataupu, ma o lea foi e i ai isi vaega o le lipoti e fia faamaea. Ae i lau Afioga ou te tatalo atu pea, o lea lava ua ou maua lau saunoaga mai o le faaiuga lava ua aumai i le Komiti o le mea lea. Ae ou te fautua atu pea i le faaupuga o le teuteuga, e le o talafeagai i le Tulafono o itumalo faaalalafaga. Ona o le faapea mai o le tosi o se laina, o le tosi lava o le laina i luga o le pepa, ae ao ona i ai i totonu o le faamalamalamaga o tuaoi ia pine e fesootai ai laina ia, e fua i ai ia le gaioiga o le galuega. Na o le pau lava lea lau Afioga, ou te augofie lava lau Afioga e toe tapena lelei mai, le mea lea ua finagalo i ai le Maota. Ae ou te faamolemole atu i le tulaga lena, e faigata tele ona tatou avatu le ituaiga teuteuga lea e fai ai le tatou Tulafono, aua e le o le Tulafono o le faigapalota, o le Tulafono o itumalo faaalalafaga. Na o le toe pai atu ma le faaaloalo.

**FOFOGA FETALAI:** Tulai mai lau Afioga i le sui Taitai o le Itu Agai....

**Afioga Hon AEAU PENIAMINA LEAVAISEETA (Falealupo):** Lau Afioga i le Fofoga Fatalai, e talitonu e faigata foi i le matou Taitaifono ma le matou komiti ona tulai mai, leaga ai e ava i le Minisita. Lau Afioga i le Fofoga Fatalai, ou te tulai atu e momoli atu le faafetai. Faafetai i le maotaga lenei, aisea? leaga ou te talitonu e i ai le mea na base ai la outou palota i le palota lea talu ai nei. Palota i suesuega a le Komiti ma le mamalu o le atunu na autovaa atu i tai. E lei soona faia. O mea uma foi nei na matou ui mai ai le Komiti lenei, talofa e o le Komiti a le Palemene lau Afioga e le amanaia. Sa uma suesuega, o le eseesege lea o lou talitonuga na o oe ma le suesuega na aofia ai le atunu. Ae faafetai i le tofa. Faafetai.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga e leai lava se faafitauli o le lalolagi lenei e leai se fofo, e i ai lava le fofo o mea uma. E i ai le igoa matai o le itulagi lea e faaigoa ia Taatiamai. Taatia maia, e tele taeao o le atunu e...

**FOFOGA FETALAI:** E manatu o le tali foi lea o lea ua saunoa le Minisita, taatia maia i le Matagaluega. O le a tagai i ai le Matagaluega e uiga i le atugaluga i le faaigoaina o le Tulafono, o le a nafa ma afioga i alii loia mo le faatulagaga ina ia faatulaga tonu i le mea e talafeagai ona i ai.

**26 ME 2015**

**Tulafono Tau Faaofi o Teuteuga o le Faavae (Nu.2) 2014**  
**- iloiloga auiliili**

O fea e ave i ai aiaiga o le Tulafono ina ia taatia i le agatonu, fai lena. Momoli atu le faafetai tele o lea ua maea ia atuvasa sa tatou lauliliuina i se taimi ua fai si umiumi ona e le faigofie, ae faamalo atu le tofa i le paia ma le mamalu o le tatou Maota. Faamalo atu foi i lau Afioga i le Minisita, tatou te i luga lava o le fefinauaiga ma le faaaliga o taofi, ae tasi lava le faafitiga o aleaga ina ia manuia ma taatia i le agatonu la tatou Tulafono o Komiti o faigapalota.

**FUAIUPU 6:** Tulafono faatonutonu tau soloaiga.

*Faamaonia.*

**FUAIUPU 1 MA LE IGOA:**

**FUAIUPU 1:** **Igoa puupuu ma le amataga.**

**IGOA:** **Teuteuga o le Tulafono o Faiga Palota (Nu. 2) 2015.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Faiga Palota (Nu. 2) 2015 faatasi ma Teuteuga.*

**TULAFONO TAU FAAOFI O TEUTEUGA O LE FAAVAE (NU.2)**  
**2014 - iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitafono o le Komiti o Oloa Gaosia Tulaga muamua, Mataupu tau Pisinisi, Alamanua ma Leipa.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te tulai atu e faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai e faapea, Ina ia faagasolo le Tulafono Tau Faaofi o Teuteuga o le Faavae (Nu. 2) 2014 faatasi ma Teuteuga ma Faasaoga.*

*Faaluaina e le sui usufono mo Siumu.*

**26 ME 2015**

**Tulafono Tau Faaofi o Teuteuga o le Faavae (Nu.2) 2014**  
**- iloiloga auiliili**

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o Oloa Gaosia Tulaga muamua, Mataupu tau Pisinisi ma Leipa i le Tulafono Tau Faaofi o le Teuteuga o le Faavae Nu 2 2014.

O le a sagai atu loa le Fono Aoao i le Iloiloga auiliili o le Tulafono Tau Faaofi o le Teuteuga o le Faavae Nu 2 2014. E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

**FUAIUPU 2: Ua teuteuina le Fuaiupu 6.**

*Faamaonia.*

**FUAIUPU 3: Ua teuteuina le mataupu 18.**

*Faamaonia.*

**FUAIUPU 4: Ua teuteuina le mataupu 19.**

*Faamaonia.*

**FUAIUPU 5: Ua teuteuina le mataupu 25.**

*Faamaonia.*

**FUAIUPU 6: Ua teuteuina le mataupu 44.**

*Faamaonia.*

**FUAIUPU 7: Ua teuteuina le mataupu 49**

*Faamaonia.*

**Afioga Hon PALUSALUE FAAPO II:** Lau Afioga.....

**26 ME 2015**

**Tulafono Tau Faaofi o Teuteuga o le Faavae (Nu.2) 2014**  
**- iloiloga auiliili**

**FOFOGA FETALAI:** O le a le fuaiupu?

**Afioga Hon PALUSALUE FAAPO II:** O le fuaiupu 4.

**FOFOGA FETALAI:** Fuaiupu 4 po o le.....

**Afioga Hon PALUSALUE FAAPO II:** E leai o lou tulai atu, i le aumaiga o le Teuteuga o le Faavae. E fia malamalama la, pe aumai auauai ia teuteuga o le Faavae ma palota auauai ai e tusa ai ma....

**FOFOGA FETALAI:** Ou te manatu ne'i tei ua tatou see ese ma tulaga masani o le tatou faamoemoe. E le tasi se teuteuga o lo o tuu mai, o le atoaga atoa o le palota mulimuli. E fai lava faaali lou finagalo i le tulaga o lo o aumai ai mataupu taitasi. O le ala lea o lou fesili atu po o ua i ai aiaiga i le mea lea e te saunoa mai ai. Ae o lo o faasolo pea mea uma e tusa ai foi ma tatou mea muamua.

**FUAIUPU 8:** Ua teuteuina le mataupu 50.

*Faamaonia.*

**FUAIUPU 9:** Ua faaofiina le vaega 4A fou.

*Faamaonia.*

**FUAIUPU 10:** Ua teuteuina le mataupu 83.

*Faamaonia.*

**FUAIUPU 11:** Ua soloia le faamatalaga 1 ma le faamatalaga 2.

*Faamaonia.*

**FUAIUPU 12:** Teuteuga lautele.

**FOFOGA FETALAI:** O lo o i ai le Teuteuga a le Komiti. Tulai mai lau Afioga i le Taitaifono.

**26 ME 2015**

**Tulafono Tau Faaofi o Teuteuga o le Faavae (Nu.2) 2014**  
**- iloiloga auiliili**

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai. Ou te tulai atu ma le faaaloalo e faatu le lafo i le Teuteuga i le Fuaiupu 12 e faapea:

**"TEUTEUGA:**

*Ia faaopoopo le parakalafa (e) fou e faapea, (e) soo se faasinomaga i tagata palota taitoatasi, po o sona suiga tau i le gagana, ia suaia i le itumalo o nuu i le taulaga po o sona suiga tau i le gagana.*

*Faamaonia le Teuteuga.*

*Faamaonia le Fuaiupu 12 e pei ona Teuteuina.*

**FUAIUPU 13: Teuteuga faatupulaia.**

*Faamaonia.*

**FUAIUPU 1 MA LE IGOA:**

**FUAIUPU 1:** *Igoa puupuu ma le amataga.*

**IGOA:** *Teuteuga o le Faavae (Nu. 2) 2014.*

**FOFOGA FETALAI:** O lo o i ai le faasaoga a le Komiti. Tulai mai le Taitaifono.

**Afioga Hon LEAUPEPE TOLEAFOA APULU FAAFISI:** Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa o le Tulafono e faapea:

**"FAASAOGA:**

*Ia aveese le (Nu.2) ma le fuainumera 2014 ma suaia i le fuainumera 2015, ma faiatuaia ai le igoa o le Tulafono e faapea:*

**"Teuteuga o le Faavae 2015."**

*Faamaonia le Faasaoga.*

**26 ME 2015**

**Tulafono Tau Faaofi o Teuteuga o le Tulafono o Faiga Palota (Nu.2)**  
**2015 – faitauga faatolu**

*Faamaonia le Fuaiupu I ma le Igoa e pei ona Faasaoina.*

*Na faagasolo le Tulafono Tau Faaofi o le Teuteuga o le Faavae 2015  
faatasi ma Teuteuga ma le Faasaoga.*

**TULAFONO TAU FAAOFI O TEUTEUGA O LE TULAFONO O  
FAIGA PALOTA (NU 2) 2015 - faitauga faatolu**

**Afioga Hon FIAME NAOMI MATAAFA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o Tulafono o Faiga Palota (Nu 2) 2015 i lona faitauga faatolu.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE FAAVAE 2015  
- faitauga faatolu**

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Teuteuga o le Faavae 2015 i lona faitauga faatolu faatemokalasi.*

*Faaluaina le lafo e le Sui Palemia ma le Minisita mo Galuega Tau Alamanuia ma Atinae a le Malo.*

**Afioga Hon Palusalue Faapo II:** Lau Afioga i le Fofoga Fetalai. Na ona ou fia malamalama lava ma faailoa atu i lau Afioga ma au faaiuga. Ona o teuteuga o le Faavae, e tatau ona fai se palota tauvalaau, o le Teuteuga lea o le Faavae, ae o lea ua faalogo atu, o lea ua faagasolo le pasia o le faitauga lua ma le tolu, ae o lea e tatau ona fai palota tauvalaau o le teuteuga o le Faavae. O le mea lea ua ou tulai atu ai lau Afioga.

**FOFOGA FETALAI:** O lea ua teletelevave mai lau taavale ao lea ou te.... we are in the process. Aua le atugalu lau Afioga i le Taitai o le Itu Agai, o lea o le a tatou oo atu i ai. Ua maea ona faamalieina aiaiga o le faavae e tusa ai ma le vaitaimi i le va o faitauga faalua ma le faitauga faatolu o le Tulafono Tau Faaofi o le Teuteuga o le Faavae 2015.

**Tulafono Tau Faaofi o Teuteuga o le Faavae 2015**  
**- faitauga faatolu**

O le aiaiga mulimuli e tatau ona faamalieina o le lagolagoina lea o le faitauga faatolu i ni palota e le itiiti ifo i le lua vaetolu i sui usufono o le Palemene, e pei ona atugalu i ai lau Afioga i le Taitai o le Itu Agai.

**Tofa Lealailepule Rimoni Aiafi:** Lau Afioga i le Fofoga Fetalai...

**FOFOGA FETALAI:** Ia...

**Tofa Lealailepule Rimoni Aiafi:** Faafetai lava mo lenei taeao fou ma le aso fou ma le faasologa o le tatou Fonotaga i lenei aso. E pei lava ona malie i saunoaga o lenei aso, o le taeao o le faatemokalasi. O lea la e fautua atu ai i le matou taitai, e manaia pe afai sana saunoaga foi lea. Tatou palota faatemokalasi. Ma le faaaloalo lava.

**Afioga Hon Palusalue Faapo II:** Lau Afioga i le Fofoga Fetalai, o lea ou te tuualalo atu i le Afioga i le Palemia, ina ia palota i le musumusuga a le Agaga Paia, e tusa ai ma upu tomua o tatou Tulafono i lenei taeao. O i e iloa ai le moni o au saunoaga i le Faatemokarasi, le Faatemokarasi lena ia palota le tagata i lona aiatatau, lea e te saunoa soo ai, o le Vaega Faaupufai e Puipuia Aiatatau.

**FOFOGA FETALAI:** O lea ua ou maua atu lau Afioga. O lena e te le i tali i le fesili a lau sui usufono. Iaí

**Tofa Levaopolo Talatonu (Gagaemauga Nu.2):** Leai, e ese le mea lea e saunoa i ai le Taitai o le Itu Agai ese lana pepa lea e pasi mai ia matou palota uma i le mea e finagalo i ai, ioe.

**FOFOGA FETALAI:** O le a faatino le Fesili o le faitauga faatolu i se Palota Tauvalaau. E tatalo atu i le tatou Maota o le a ta le tatou logo, o le mea masani ona faagasolo lea o le tatou Palota Tauvalaau e ala i le pasiaina o le tatou Faavae.

*Na ta le logo.*

**Tofa Hon Tuuu Anasii Leota (Siumu):** Lau Afioga i le Fofoga Fetalai...

**FOFOGA FETALAI:** Ia, Tuuu...

**Tofa Hon Tuuu Anasii Leota:** Ona o lea ua alo i le palota, ae silafia e lau Afioga o au le tasi o sui usufono na faaleo lou tetee i le Teuteuga lea o le Faavae, a o lea ua tulai le Taitai o le Itu Agai, e faamalulu atu, o le a ou lagolagoina le mea ua finagalo i ai le Malo. Ma le faaaloalo lava.

**Tulafono Tau Faaofi o Teuteuga o le Faavae 2015**  
**- faitauga faatolu**

**FOFOGA FETALAI:** O le mea lava lea e leaga ai mea e faufau, ioe. Ia, tatou malilie ia tatou onosai i le mea...

**Afioga Hon Palusalue Faapo II:** Lau Afioga i le Fofoga Fetalai, na ona ou fesoasoani atu i lou uso, aua e te palota i lou palaai, ioe, o lae faafogafoga mai lou itumalo ma le atunu, palota i lau aiatatau ma le mea tonu e tatau ona fai.

**Afioga Hon Le Mamea Lemalu Su'a Leatuavao Tuiletufuga Ropati Mualia:** Lau Afioga i le Fofoga Fetalai, e faamalulu atu i le tulai atu ma le ava ma le faaaloalo, o le ma nonofo ai i le taeao ma si ou uso lea, na ou fautua i ai i lona faavalevalea o lea la ua toe foi mai ai e palota i le mea lea ma te i ai, a o lea ua toe talitonu le sui usufono, e sao lelei lava le mea lea e fai atu ai le toeaina. Faafetai.

**Tofa Hon Tuuu Anasii Leota:** Lau Afioga i le Fofoga Fetalai, na ona fia faasao lava pei e tau sasi le upu lea, e le faavalevalea. Na fautua mai ou fai atu, o lea lava ou te tatalo pea i le Alii e fesoasoani mai ia te au. E faamalulu atu Palu, o lea o le a ou palota i lou lagona. Ma lou faaaloalo lava.

**FESILI:** O le Fesili pe o le a faitauina nei le Tulafono Tau Faaofi o Teuteuga o le Faavae 2015 i lona faitauga faatolu, o e finagalo i ai tutulai mai.

**PALOTA TAUVALAAU T.T.93(1)**

1. Susuga Hon Tuilaepa Fatialofa Auelua Luplesoliai Aiono Neioti Sailele Malielegaoi.
2. Tofa Hon Fonotoe Nuafesili Pierre Lauofo.
3. Afioga Hon Fiame Naomi Mataafa.
4. Tofa Hon Tuiloma Lameko.
5. Afioga Hon Lautafi Fio Selafi Purcell.
6. Afioga Hon Tuisugaletaaua Sofara Aveau.
7. Tofa Hon Tolofuaivalelei Falemoe Leiataua.
8. Afioga Hon Le Mamea Lemalu Su'a Leatuavao Tuiletufuga Ropati Mualia.
9. Tofa Hon Faamoetauloa Lealaiauloto Ulaitino Faale Tumaalii.
10. Afioga Hon Magele Mauiiu.
11. Afioga Hon Manualesgagalala Mati Tuigamala Enokati Posala.
12. Afioga Hon Sala Fata Lisati Pinati.
13. Afioga Hon Leaupepe Toleafoa Apulu Faafisi.
14. Tofa Hon Tuuu Anasii Leota.
15. Tofa Lealailepule Rimoni Aiafi.
16. Afioga Hon Faumuina Tiatia Faaolatane Liuga.

26 ME 2015

**Tulafono Tau Faaofi o Teuteuga o le Faavae 2015**  
**- faitauga faatolu**

17. Tofa Fagaivalu Kenrick Samu.
18. Afioga Tufuga Gafaleata Faitua.
19. Tofa Alo Fulifuli Taveuveu.
20. Afioga Lafaitele Patrick Leiataualesa.
21. Tofa Faimalotoa Kika Iemaima Stowers.
22. Tofa Tuisa Tasi Patea.
23. Tofa Lenatai Victor Faafoi Tamapua.
24. Tofa Sooalo Mene.
25. Afioga Afoafouvale John Moors.
26. Afioga Taefu Lemi.
27. Susuga Ifopo Matia Filisi.
28. Afioga Tialavea Fea Tionisio Seigafolava.
29. Tofa Tusa Misi Tupuola.
30. Afioga Maualaivao Pat Ah Him.
31. Afioga Peseta Vaifou Tevaga.
32. Susuga Seiuli Ueligitone Seiuli.
33. Afioga Tafua Maluelue Tafua.
34. Afioga Hon Gatoloaifaana Amataga Alesana Gidlow.
35. Susuga Hon Papaliitele Niko Lee Hang.
36. Tofa Agafili Patisela Eteuati Tolovaa.

**IOE – 36**

**FOFOGA FETALAI:** O e tetee i le lafo, tutulai mai.

1. Afioga Hon Palusalue Faapo II.
2. Afioga Hon Aeau Peniamina Leavaiseeta.
3. Tofa Motuopuaa Uifagasa Aisoli Vaai.
4. Afioga Afualo Wood Utu Salele.
5. Susuga Papalii Faavaivaiomanu Taeu Masipau.
6. Tofa Tuileutu Alavaa Voi.
7. Tofa Tapuai Toese Ah Sam.
8. Tofa Aveau Tuala Lepale Niko Palamo.
9. Tofa Levaopolu Talatonu.
10. Tofa Toeolesulusulu Cedric Pose Salesa Schuster.

**LEAI – 10**

**FOFOGA FETALAI:** O le iuga lenei o le tatou Palota Tauvalaau i le Tulafono Tau Faaofi o le Teuteuga o le Faavae. O e na lagolagoina le lafo e 36, o e na tetee e 10. Ma ou te faasilasila atu ua pasia aloaia le Tulafono Tau Faaofi o Teuteuga o le Faavae 2015.

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**26 ME 2015**

**Tulafono Tau Faaofi o le Faatatauina o Tupe Faaopoopo (Nu.2)**  
**2014/2015 – faitauga muamua**

**FOFOGA FETALAI:** Ia, ou te manatu ua tatau ona vavae foe, o le a tatou alo i le faiga malologa o le aoauli, fai se tatou sailiga malosi, ona faapena lea ona faaauau ai le tatou Galuega pea tatou toe taliu mai. O le a faataatia ese Taualumaga a le Fono Aoao mo lana malologa o le aoauli.

*Na faataatia ese Taualumaga a le Fono Aoao i le itula e 12:38 i le aoauli ma toe faaauau i le itula e 1:23 i le aoauli.*

**FOFOGA FETALAI:** E faasilasila atu ua toe amatalia nei Taualumaga a le Fono Aoao Faitulafono.

Ia, e faamalo atu le onosai i lenei vaega o le aso, e manatu o lea ua taliu mai le tatou malologa puupuu. E i ai lava le faamoemoe ina ia maua pea ma fai se tatou malologa faavaitaimi ona o le tulaga ia maua pea lo outou soifua manuia aemaise o le tatou malologa pei ona masani ai.

**TULAFONO TAU FAAOFI O LE FAATAUTAUINA O TUPE  
 FAAOPOOPO (NU.2) 2014/2015 – faitauga muamua**

**Susuga Hon TUILAEPÀ FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afiofa i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2014/2015 i lona faitauga muamua.*

*Faaluaina e le Sui Palemia ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.2) 2014/2015 i lona faitauga muamua.*

**TALA FAATATAU O TUPE FAAOPOOPO (NU.2) 2014/2015  
 – faataatia i luga o le Laulau a Fono**

*Na faataatia i luga o le Laulau a Fono e Hon Tuilaepà Fatialofa Auelua Lupesoliai Aiono Neioti Sailele Malielegaoi, le Tala Faatatau o Tupe Faaopoopo (Nu.2) 2014/2015.*

**26 ME 2015**

**TULAFONO TAU FAAOFI O LE FAATATAUINA O TUPE  
FAAOPOOPO (NU.2) 2014/2015 – lafo mo le faitauga faalua**

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetralai ou te tulai atu e faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo Nu.2 2014/2015 i lona faitauga faalua.*

*Faaluaina e le Sui Palemia, Minisita mo Galuega Tau Alamanuia ma Atinae a le Malo.*

**FOFOGA FETALAI:** E tusa ai ma le Tulafono Tumau 132, o le a tolopo felafolafoaiga o le Tulafono Tau Faaofi i le Tala Faatatau Faaopoopo (Nu.2) 2014/2015 e le itiiti ifo i le 14 aso a o tuuina atu le Tala Faatatau Faaopoopo (Nu.2) 2014/2015 mo le iloiloga aulili i le Komiti o Tupe Maua ma Tupe Totogi ma toe lipoti mai i le Fono Aoao.

**TULAFONO TAU FAAOFI O LE FAATATAUINA O TUPE 2015/2016  
– faitauga muamua**

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetralai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2015/2016 i lona faitauga muamua.*

*Faaluaina e le Sui Palemia, Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi o le Faatatauina o Tupe 2015/2016 i lona faitauga muamua.*

**TALA FAATATAU AUTU O TUPE 2015/2016  
– faataatia i luga o le Laulau a Fono**

*Na faataatia i luga o le Laulau a Fono e Hon Tuilaepa Fatialofa Auelua Lupesoliai Aiono Neioti Sailele Malielegaoi, Minisita o Tupe le Tala Faatatau o Tupe 2015/2016.*

**26 ME 2015**

**TULAFONO TAU FAAOFI O LE FAATATAUINA O TUPE 2015/2016**  
**- lafo mo le faitauga faalua**

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fatalai ou te tulai atu e faatu le lafo, *Ina ia faitauina nei le Tulafono Tau Faaoofi o le Faatatauina o Tupe i lona faitauga faalua.*

*Faaluaina e le Sui Palemia.*

**FOFOGA FETALAI:** Ia, tulai maia lau Afioga i le Palemia mo le Saunoaga i le Tala Faatatau Autu o le Tupe 2015/2016.

**SAUNOAGA I LE TALA FAATATAU O TUPE 2015/2016**

**Afioga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fatalai ma le mamalu o le Maota, e tusa ai ma le Tulafono Tumau 124, e ia te au le ava ma le faaaloalo e avea ai au e fai ma sui o le Malo ou te tuuina atu ai se otootoga o le Tala Faatatau Autu o le Tupe mo le tausaga 2015/2016 i luma o le Laulau a Fono a le Palestene.

**1. FAAVAE O LE TALA AUTU O LE TUPE**

Lau Afioga i le Fofoga Fatalai ma sui usufono mamalu o le Palestene, o lenei Tala o le Tupe ua faavae i se faasoa ua utiuti ma le lava, talu mai lava tulaga ogaoga sa feagai ma le tatou tamaoaiga, pei o le faaletonu o le tamaoaiga o le lalolagi i le 2008, o galulolo i le 2009 faapea foi le afa o Evani i le 2012, sa maitauina ai le siitai o tupe faaalu a le tatou Malo e tali atu ai i ia faaletonu. Sa maitau foi o nei tupe faaalu sa tele se sao o atunu mai fafo i le faatupeina. Peitai, o le tausaga 2015/2016, o le a matua tuuitiitia tupe faaalu, ona o lea ua tele ina maea galuega laveai, ma galuega tauatiae sa feagai ma le tatou Malo, aemaise i le tau faaleleia o mea na faaleagaina e le afa o Evani.

Lau Afioga i le Fofoga Fatalai ma sui usufono mamalu o le Palestene, o le upu moni lava e le gafatia e le Malo le faaauau pea o ia tupe faaalu i le maualuga e pei ona i ai i le lima tausaga ua tuanai atu e aunoa ma le fesoasoani a tatou paaga po o le siitia o tatou lava tupe e maua mai tiute ma lafoga. E ao foi ona tatou taumafai ina ia faasoasoatau tupe faaalu ina ia ausia le tapulaa o tupe faaalu nai lo tupe maua ia muta mai le 3.5% o le tuufaatasiga o le tamaoaiga po o le GDP.

Ina ia ausia lea tulaga, o lea ua manatu ai le Malo ina ia tuuitiitia tupe faaalu i le tausaga fou. Ma ou te fiafia e faailoa atu, ua mafai ona faatino lea faamoemoe e aunoa ma le oia o le auauanga mo le mamalu o le atumu. O le feau taua, ia fua le manao i seleni ua mafai ona tatou maua.

## Saunoaga i le Tala Faatatau o Tupe 2015/2016

### **11. TAIALA O LE TALA O LE TUPE**

E i ai le manatu o le a siitia le tamaoaiga i le 1.9% i le tausaga lenei o le a faagasoilo i le tausaga fou, 2015/2016, ma o le a ausia foi le tuuaofaiga o tupe maua a lo tatou atunu po o le GDP i le \$2piliona tala. O le tau faauiiu ai o galuega toe faaleleia talu mai le afa o Evani ma le maea ai o le fono tele a Malo tauatiae o le lalolagi lea na usuia i Samoa nei i le tausaga ua tuanai, o le a avea lea ma faavae e tuuitiitia ai tupe faavae mai le 2015 ma le 2016, fua i le tausaga na tea nei.

O le faasiliga o tupe faalu nai lo tupe maua, o le a faamauina lea i le 4.7% o le tamaoaiga, e maualuga atu nai lo le tapulaa e 4.2% na fuafua mo le tausaga talu ai. Peitai, o se alafua iloga pe a fua i le tulaga pau maualalo o tupe maua.

I le vaega o tupe maua, e leai se faamoemoe o i ai e siitia tiute ma lafoga i le aoaotetele, se i vagana le faamoemoe e faatino na o nai suiga laiti i le lafoga mo faguinu po o fagu suamalie, o ava malosi faapea foi ma sikareti e unuai ai le soifua maloloina, aemaise lava o le soifua maloloina o nai fanau laiti ia aua ne i afaina tele o latou nifo muamua i le fafia i ia mea suamalie. O lo o fuafua foi e faatino se lafoga e lagolago i le malosiaga faafouina po o le sailia lea o le eletise i mea lava e maua i Samoa nei e pei o le vai, o le la, ia ma le matagi, (renewable energy source). O lea fuafuaga o le a vave ai ona ausia le faaitiitia le tau o le eletise i le mamalu o le atunu, e faapea foi ona ausia le manulauti ina ia 100% le eletise e maua mai i le malosi faafouina o mea e maua i totonu lava o Samoa i le tausaga e 2017.

O le a paø maualalo foi tupe faameaalofa mai a tatou paaga i le tausaga fou. E mafua lea tulaga ona o le toe fetuunaiga o tulaga o lo o i ai tatou nonogatupe lea ua see mai i le medium to low debt distress, o lona uiga, mai le maualuga i le tulaga maualalo. O lona uiga la, o le a le toe agavaa ai Samoa i le 100% o tupe faameaalofa, ae see mai i le 50% tupe faameaalofa, 50% tupe nono, pei lava o le tulaga foi lele, afai lava ua malosi lou tamaoaiga, ia e faapena foi ona e le toe mommia tele ni meaalofa mai isi atunu. O le a fesoasoani foi i le maea ai o galuega toe faaleleia ona o le Afa o Evani, i le pau maualalo o tupe faameaalofa i le tausaga fou. O le tulaga masani lava lea sa o tatou valoia mai le aso na see ese ai le faatulagaga o le tatou tamaoaiga i le lalolagi, mai le tulaga mativa na i ai Samoa i le tulaga maualuga e pei ona faatulaga ai Samoa e le Malo Aufaatasi.

E leai la se faamoemoe e toe faatino nisi nonogatupe tetele, se i vagana ua ausia aiaiga o taiala mo nonogatupe pe iloga sona sao i le atinae o le tamaoaiga.

### **III. ATINA'E AUSIA I LE LIMA TAUSAGA UA MAVAE**

Lau Afioga i le Fofoga Fetalai ma sui usufono mammal o le Palemene.

E ia te au le ava ma le faaaloalo ou te tuuina atu ai se otootoga o faamatatalaga i nisi o atinae sa ausia le lima tausaga talu ai o lenei lava foi Nofoiga Faapalemene. Ua ou taua le Nofoiga Faapalemene, ona o le tatou galuega e fai faatasi.

### Saunoaga i le Tala Faatatau o Tupe 2015/2016

Na aafia le tamaoaiga o le atunuū i le lima tausaga ua mavae, e mafua mai lea i faalavelave faalenatura faapea ai ma faaletonu o le tamaoaiga o le lalolagi, (global financial crisis). Sa tali atu le Malo i nei aafiaga e ala lea i le fesiitai o tupe faaaluu aua le faatinoina o galuega toe faaleleia ma faataoto ai polokalame e uunaia ai atinae mo le tamaoaiga o le atunuū, talu mai le faaletonu o le tamaoaiga o le lalolagi.

E ui la i le tulaga maaleale sa i ai, na iloga ona siitia le tamaoaiga pe a faapasene i le 5.6% i le tausaga faaletupe i le 2010/2011. Na faatupulaia le tamaoaiga i le 0.4% i le 2011/2012, ae pau maualalo i le 2% i le 2012/2013 ona o aafiaga o Evani ia Tesema 2012 na faaleagaina ai le tele o vaega o le atunuū. Ae peitai, na toe siitia le tamaoaiga i le 2013/2014 i le 1.2%, ona o galuega toe faaleleia o le Afa o Evani, o lo o faamoemoe o le a siitia le tamaoaiga i le 2.3% i le Tausaga Faaletupe 2014/2015 pe a maea faaiu nei i le masina o Iumi, talu ai ona o le taligamalo i le Fonotaga ma Atunuū Laiti Tauatiae o le lalolagi ma le fausiaina o faetalimalo tetele e taipei o le Lamana Hotel, Aggie Greys Beach Resort, Aggie Greys Hotel, Aga Reef Resort ma le Return to Paradise Resort.

I le itu lava ia tau i aoaoga, e tele fesoasoani i nei vaega ona o se tasi o vaega o lo o ave i ai le faamuamua a lo tatou Malo e tauala atu i taiala mo le atinae o Samoa (SDS). Sa sami aloaia le fuafuaga faataatitia mo vaega maoti o aoaoga o le 2013-2018, o fuafuaga mamao ia e limataitaiina ai galuega faamuamua mo le atinae o aoga, faapea foi ona fesoasoani le Malo i polokalame o le totogiina o Pili Aoga o tamaiti aoga Tulaga Lua faapea foi ma Kolisi.

Ua faapea ona tuuina atu i lalo o le faamalumaluga a le Iunivesete Aoao o Samoa, le Iunivesite Faafomai (Oceania University of Medicine) ma o faamanuiaga uma e ono maua mai ai, o le a pau tonu lava i tamaiti aoga o le atunuū e aunoa ma le toe aiaina mai fafo.

O le maea ai o le Maota Gasegase i Motootua e atagia ai le faamuamua a lo tatou Malo e ala i le atinae o le soifua maloloina. O lenei falemai ua faatotogaina i masini faaonaponei e faatino ai togafitiga ma auaunaga mo tagata lautele. Ua maea foi ona toe faaleleia falemai faaitumalo i Poutasi, Lalomanu, Safotu, Foailalo ma Sataua. Ina ia maua pea e le mamalu lautele togafitiga i nuu i tua, auaunaga uma tau le Soifua Maloloina.

I le vaega o faatoaga, ua maea foi ona faalauiloa aloaia le Fuafuaga Faataatitia mo le Vaega Maoti o Faatoaga e limataitaiina ai galuega faamuamua. Sa faamuamua le toe lalagaina o le vaega o faatoaga e ala i le polokalame faatosina mo le toe totolina o le koko, niu ma le kofe faapea polokalame o le Talomua. O lo o vaavaalua le galuega lea ma le polokalame o le uunaia o atinae o faatoaga (SACEP) e ala lea i le faaleleia o lafumanu, o faatoaga mo fualaua faisua ma fualaua aina. O lea foi ua amatalia se atinae fou mo le uunaia o Faatoaga Faapisinisi (Agribusiness). O lenei taumafaiga e agavaa lava i ai pisinisi tau faatoaga i nonogatupe ma atinae ai maketi i fafo mo le faatauina atu o fua o faaeleeleaga.

### **Saunoaga i le Tala Faatatau o Tupe 2015/2016**

O lo o faaauau pea foi suesuega a le Faalapotopotoga o Suesuega Faasaienisi a Samoa mo metotia e gaosia ai oloa eseese mai fua o tatou lava faaeleeleaga pei o le avoka ma le ulu e fesoasoani ai i le aufaipisinisi.

I le tulaga o alatetele, ua tele ina siitia ma faaleleia le tulaga o auala i le atunuu atoa, talu ai galuega toe faaleleia ona o le Afa o Evani. Ua maea foi le auala fou mai Samusu i Lalomanu. O le a faapea foi ona toe faaauau le auala mai Vailoa e agai atu i Vaitele. O le auala mai i Apia i Paleolo, o le a toe faaleleia ina ia alofia aafia ona o suiga o le tau. Ua maea fausia foi e le Pulega o Femalagaiga i Luga o le Lauelele fuafuaga mo le siitia o tulaga o auala i totolu o le taulaga faapea ma afioaga i tua.

O lo o ave pea le faamamafa i le atinae o le malosiaga faafouina o le eletise ina ia vave ausia le eletise i se tau maualalo ma gafatia e o tatou tagata. Ua mafai nei ona gaosia le eletise mai malosiaga faafouina pei o le malosi o le l ma le savili. O lo o mataitu foi le fale eletise i Fiaga ina ia mautinoa le maua pea ai e tagatanuu le auaunaga tau eletise i so o se taimi.

O lo o faaauau pea le fesoasoani a le Iuni a Europa i le faatupeina o atinae o le Suavai ina ia siitia pea le auaunaga mo le atunu lautele.

I le itu tau fesootaiga, ua maea nei le atinae mo le Faalauteleina o Fesootaiga Faatekonolosi (National Broadband Highway Network). O lenei atinae taua o le a fesoasoani malosi i le siitia o le saoasaoa i fesootaiga tau tekonomosi. E mafai foi ona fesoasoani i auaunaga faa-Soifua maloloina faapea ma aoaoga ina ia faafagofie fesootaiga ma nuu ma afioaga i tua.

O le vaega o Turisi o se tasi lea o atinae o lo o ave pea i ai le faamuamua ma le lagolago a lo tatou Malo. O le fesoasoani a le Malo ua mafai ai ona fausia faetalimalo tetele, o le Sheraton Aggie Grey's Beach Resort, Return to Paradise Resort i Lefaga, o le Aga Reef Resort i Lalomanu, faapea le Orator Hotel i Tanumapua. O isi faetalimalo pei o le Lamana Hotel i Taumeasina ma le Aggie Grey's Hotel i Vaisigano o lo o fuafua e maea le fausiaina i le amataga o le tausaga fou.

I le tausaga ua tuanai, sa talimalo ai Samoa i le fonotaga muamua aupito i t 1 i totolu o le Pasefika mo atunu laiti tauatiae o le lalolagi. O se avanoa lelei lea e saga faalauiloa ai Samoa i le lalolagi ma faatupulaia ai ia tatou atinae e faasino i tagata tafafao maimoa mai faapea foi fefaaatauaiga.

#### **IV. OTOOTOGA O LE TALA O LE TUPE**

Lau Afioaga i le Fofoga Fetalai

O le otootoga lenei o le Tala Faatatau Autu o le Tupe mo le Tausaga Faaletupe 2015/2016:

##### **Tupe Maua**

<b>\$689,013,681</b>	
Tupe Maua Masani	\$551,916,733
Tupe Faameaalofa mai Fafo	\$137,096,948

**Saunoaga i le Tala Faatatau o Tupe 2015/2016****Tupe Faaalu** **\$785,357,784**

Tupe Faaalu Faalafono	\$103,298,657
Tupe Faaalu i Polokalame	\$478,223,687
Tupe Faaalu i Atinae	\$189,488,730
Tupe Faaalu le Fuafuaina	\$14,346,711

**Faasiliga o Tupe Alu i Tupe Maua** **\$96,344,104)**

Faatuspeina mai:

Nonogatupe e m m tului \$84,082,700

**Tupe Pa'ū**

**\$12,261,404)**

O le aotelega o le Tala o le Tupe, ua faamoemoe e faamauina ai se faasiliga o tupe faaaalu nai lo tupe maua e tusa lea ma le \$96.3 miliona tala po o le 4.7% o le tamaoaiga po o le GDP lea na tauina atu muamua e \$2 piliona. O lenei faasiliga o le a faatuspeina mai nonogatupe maualalo o latou tului. O lona uiga, o nonogatupe ia i atinae o lo o faaauau pea, ona pei ona silafia, o atinae nei e lua, tolu, faausaga o faagaso lo.

O lenei tulaga o lo o atagia ai le faanaunautaiga a lo tatou Malo, ina ia ausia le 3.5% i se taimi lata mai.

**V. FAAVAE O TUPE MAUA**

Lau Afioga i le Fofoga Fetalai,

O le a faaititia a tatou tupe maua masani i le 0.2%, e mafua lea i faatosina e unuiina ai le atinae o faletalimalo, oloa gaosi faapea malosiaga faafouina, e masani ona lafoai ai ia lafoga ma tiute e faatosina mai ai pisinisi nei. Pei ona taua muamua, e 23% o le a pau ai tupe faameaalofa mai o tatou paaga talu ai ona ua suia le faatulagana o aitalafu a Samoa mai le ñhigh debt distress o le ñmedium debt distress ma ua avea ma tulaga e le toe agavaa ai Samoa i le 100% atoatoa o meaalofa, ae ua agavaa nei i le na o le 50% tupe faameaalofa a o le paleni e 50% o tupe nono.

Ina ia ausia taiala mo le soifua manuia faapea le tali atu i suiga o le tau, o lea ua manatu ai le Malo e faatino faiga faavae o lo o taua i lalo mo le tausaga fou faaletupe 2015/2016:

**1. *Lafoga i faguinu suamalie, ava malosi ma tapaa***

O le soifua maloloina o tagatanuu o Samoa, o se luitau e ave i ai le faamuamua a le tatou Malo. O le tele o faamai ua maliliu ai le toatele o le tatou atunu ma le Pasefika atoa e aofia ai le tino puta pe mafua mai i le tino puta, o le totomaualuga, o le mai suka ma nisi o lo o faatupulaia pea, talu ai lava nei mea o taumafa.

### **Saunoaga i le Tala Faatatau o Tupe 2015/2016**

Ua matauina foi ia le faatupulaia pea o vaegatupe faaalu a lo tatou Malo e tau togafiti ai gasegase nei, e mafua mai i taumafa ia lea e mafua ai le lafoga. Ia ina ia faaitiitia nei tulaga o lea o le a faatino ai le lafoga mo faguinu suamalie faapea le ava malosi tusa ma le 6.5% faatasi ai ma le 5% o le lafoga i tapaa.

#### **2. Lafoga mo le atinae o malosiaga faafouina.**

O aafiaga ona o suiga o le tau, o ni luitau o lo o feagai ma atunuuma lava o le lalolagi, o le faaaogaina o suauu o lo o tele ai nei le aafia o le siosiomaga ma le fesuiaiga o le tau, a o lea e faaaoga mo so o se atinae, ua matua mautinoa e tele se aafiaga o le siosiomaga, ma e tele le sao o le faatupulaia atili o mala faalenatura e pei ona maitauina nei. Ua manatu nei la le Malo e uunaia le atinae o malosiaga faafouina o le eletise ina ia tuuitiitia ai le faaleagaina o le siosiomaga ona o kasa oona.

Ina ia ausia lea tulaga, o lea o le a faaopoopo ai sina tamai lafoga e 6.5sene i le lita i suauu e faaulufale mai aua le uunaia o atinae o le malosiaga faafouina. O lenei fuafuaga o le a vave ausia ai foi le ono faatiitia o pili eletise mo le mamalu o le atunuua, faapea le taunuua o le manulauti ina ia selau pasene le eletise e maua mai i le malosi faafouina i le tausaga 2017.

## **VI. ATINA'E FAAMUAMUA**

Lau Afioga i le Fofoga Fetalai ma sui usufono mamalu o le Palemene, o le a oo atu sina upu e talanoa i atinae o lo o ave i ai le faamuamua. O le aofaiga o tupe faaalu fuafua mo le 2015/2016, e \$785 miliona, tusa lea ma le 2% e pau ai pe a faatusa i le tausaga o lo o faagasolo nei. O lo o atagia mai ai le naunautai o le Malo ina ia faasoasoa tatau tupe faaalu e fua i tupe maua ina ia ausia alafua tau tupe ua talafeagai.

O le a ou auiliiliina atu atinae o lo o ave i ai le faamuamua mo le tausaga faaletupe 2015/2016.

#### **1. Soifua Maloloina.**

E \$79 miliona ua faaagaaga mo atinae ma polokalame a le vaega o le Soifua Maloloina e tusa lea ma le 17% o le aotelega o tupe faaalu. O vaega nei ua ave i ai le faamuamua.

- \$7.6 miliona e faatino ai le tautua a le Matagaluega o le Soifua Maloloina;
- \$6.1 miliona e fesoasoani ai i le Faalapotopotoga mo Gasegase Faamamatoto;
- \$63.8 miliona ua faaagaaga lea mo le auauanaga faale-soifua maloloina;

### **Saunoaga i le Tala Faatatau o Tupe 2015/2016**

- \$2.5milliona ua faaagaaga nei mo gasegase e moomia ai togafitiga i fafo.

#### **2. A'oa'oga**

E 79milliona ua fuafua mo atinae o aoaoga, e tusa lea ma le 16.5% o le aotelega o le atinae a le tatou Malo po o le 4% pe a fua i le tamaoaiga, o vaega nei o le a ave i ai le faamuamua.

- \$50.4milliona mo auaunaga a le Matagaluega o Aoga;
- \$6milliona ua faaagaaga e faameaalofa atu mo aoga a Ekalesia ma Aoga Tumaoti i le tausaga fou faaletupe;
- E \$2.76milliona e fesoasoani atu ai i le Pulega o Faailoga ma Tusi Pasi Taualoa a Samoa;
- E \$11milliona e faamatuu atu mo le Iunivesite Aoao o Samoa.
- E \$1milliona ma le afa e faatupe ai api, peni ma meaaoga uma e faaaoga e fanau aoga mo aoga uma a le tatou Malo.

E le o aofia ai le \$5.7milliona i lalo o le Matagaluega o Tupe o lo o fuafua nei mo le faatinoina o le polokalame mo pili aoga e fesoasoani ai i le faaaogaina o fanau a le atunu, le vaega foi lea ua le toe faaaauauina ai pili nei mai Niu Sila.

#### **3. Atina'e Tetele**

##### ***Eletise***

E \$11.3milliona se vaegatupe o lo o tuuina mai i le malosiaga tau eletise mo latou auaunaga masani. Mai lenei aofaiga, e \$7milliona e totogi ai lafoga tau suauu faaulufale mai. A o le paleni e \$4.3milliona e faaagaga mo le auaunaga mo nuu ma alaalfaga i tua e moomia se faamamaavega mai le tatou Malo e auala atu i atinae o le eletise.

##### ***Suavai***

E \$12milliona o le a faamatuu atu i le Pulega o le Suavai. Mai lea aofaiga, e \$4.22milliona e fesoasoani i auaunaga mo nuu ma afioaga i tua, ma le \$7.78milliona mai le Iuni a Europa mo atinae tetele aua le siitia o le auaunaga masani.

##### ***Auala Tetele ma Ala Laupapa***

O le aofaiga o le fesoasoani a le tatou Malo mo le Pulega o Felauaiga i le Laueelele e \$19.9milliona aua galuega faaleleia mo aualatetele ma auala laupapa. O lenei vaegatupe, e 17% e itiiti ai nai lo le tausaga o lo o faagasolo nei e faamuta mai i le faaiuga o le masina fou o Iuni, ma e atagia mai ai le faamaeaina o le tele o galuega sa moomia talu mai aafiaga mai le afa o Evani.

## Saunoaga i le Tala Faatatau o Tupe 2015/2016

### **Fesootaiga Tau Tekonolosi**

O le vaega lenei mo Fesootaiga tau Tekonolosi o se tasi o vaega o lo o ave i ai le faamuamua a le tatou Malo talu ai lona sao i le atinae o pisinisi aemaise o le atinae o le tamaoaiga atoa. Ina ia faamausaliina lenei faamuamua, o atinae nei o lo o faasaga i ai le fesoasoani a le Malo;

- \$4.23miliona e fesoasoani ai i galuega ma auaunaga a le Matagaluega o Fesootaiga;
- E \$1.74 ua tuuina atu mo auaunaga a le Ofisa o le Pule Faatonu;
- E \$1.2miliona le sao o le Malo e totogi ai auaunaga o fesootaiga tau initaneti e faaaogaina ai peau lautetele mo fesootaiga i Samoa (National Broadband Highway);
- O lo o i ai foi se fesoasoani faameaalofa mai le Faletupe o Asia ma le Faletupe o le Lalolagi, tusa lea ma le \$7.4miliona e faatupe ai se isi auupega mo fesootaiga tuusao o lo o i le taele o le sami po o le submarine cable, o uea ia e fetaiai i lalo o le vasa laulau.

### **4. Faatoaga**

O le aofai o tupe faaalu fuafua mo le atinae o faatoaga e \$13.6miliona mo le tausaga 2015/2016 aua vaega tetele nei. E \$11.3miliona e tuuina atu mo galuega a le Matagaluega o Faatoaga ae afa miliona tala o le a faaagaaga lea mo polokalame masani mo le faalauiloaina o fua o faaeleeleaga. E le o aofia i totonu o nei aofaiga fesoasoani o lo o tuuina mai i le faletupe o le lalolagi e \$4.9miliona aua le uunaia o atinae tau faatoaga po o le SACEP e aofia ai le atinae o fualau aina ma lafumanu papalagi ina ia tuuitiitia le faalagolago pea i oloa faatauina mai fafo mo le fofoga taumafa. O lo o i ai foi ma se vaegatupe e \$3.7miliona e fesoasoani ai i le toe faaleleia o faatoaga sa aafia tele i le afa o Evani. O lo o fesoasoani mai foi le faletupe o Asia i le uunaia o pisinisi mo faifaatoaga lea o lo o tuuina mai i ai le \$370,000 mo le tausaga faletupe 2015/2016.

### **5. Fefaatauaiga o Pisinisi ma Alamanuia**

O le atinae o Fefaatauaiga ma Oloa Gaosi, tasi lea vaega o lo o ave i ai le faamuamua aua e faalagolago tele i ai le atinae o le tamaoaiga. O nisi nei o vaega o lo o ave i ai le faamuamua;

- \$3.98miliona o le a tuuina atu mo le faatinoina o auaunaga a le Matagaluega o Pisinisi, Alamanuia ma Leipa.
- E \$9.32miliona e fesoasoani ai i galuega faatino a le Ofisa mo tagata tafafao maimoa mai fafo.
- E \$450,000 e tuu atu e fesoasoani ai i galuega a le Ofisa mo le atinae o pisinisi laiti (SBEC).
- E \$200,000 e tuuina atu lea mo le vaega tumaoti,
- \$125,300 e fesoasoani i le faaaauauina o le polokalame o aperenitisi o lo o faatautaia e le Iunivesite Aoao o Samoa.

### **Saunoaga i le Tala Faatatau o Tupe 2015/2016**

#### **6. Taaloga mo Tupulaga Talavou o Malo o le Taupulega 2015**

E \$5 miliona ua faaagaaga nei aua taligamalo mo taaloga a tupulaga talavou o Malo o le Taupulega e 54 Malo, e pei ona fuafuaina mo le masina o Setema 2015. O lenei faamoemoe, tusa e 1,500 tagata o le a malaga mai ai mai atunuu e 69 o le Taupulega, lona uiga e aofia ai ma isi Teritori i tua atu o Malo e 54 tumaoti pe tutoatasi o le Taupulega.

#### **VII. VAEGATUPE LE FUAFUAINA**

E \$14.3 miliona se vaegtatupe o lo o faaagaaga nei mo ni faamoemoe e le fuafuaina e ono tulai mai i totonu o le tausaga faaletupe 2015/2016.

#### **VIII. TALA FAAOPOOPO LONA LUA O LE TUPE 2014/2015**

O le Tala Faatatau Faaopoopo Lona Lua o le Tupe o lo o faagasolo nei, ua tuuina atu faatasi ma le Tala Faatatau Faaopoopo (Nu.2) o Tupe 2014/2015. O lenei Tala Faatatau Faaopoopo Lona Lua o le Tupe e leai sona tau faaopoopo ma o le a faatupe lava i fetuunaiga o seleni o lo o i ai nei i totonu lava o le Tala o le Tupe o lo o faagasolo.

#### **IX. UPU FAAIU**

Lau Afioga i le Fofoga Fetalai ma le mamalu o le Maota,

O lenei Tala o le Tupe o lo o faavae i le sini autu e faapea; õFua le manao i seleni ua maua.õ O le taiala aupito sili lea ona talafeagai mo se tamaoaiga e mausali, e le mafai le mafai ona tatou faalagolago pea lava i le agalelei o tatou paaga mai fafo. E tatau foi ona tatou tagai totoa i tupe maua o lo o afua mai i le lotoifale ma fesili, o a atinae e tatau ona ave i ai le faamuamua e gafatia e seleni ua maua? E tatau foi ona fuafua tatau galuega e ono ave i ai le faamuamua ina ia aua ne i oia auaunaga mo le mamalu o le atunuu. O le taunuuga lea o le siitia o le tulaga o le tamaoaiga o Samoa mai le atunuu tauatiae i le atunuu ua maualuga lona tamaoaiga.

Ma o aga masani lava ia i le tatou soifua po o le natura o le soifua e oo loa i le tulaga ua atiae ai le Malo, ona faapena foi lea ona tuuititia foai mai a isi Malo ona o lea lava ua mafai ona tauave e tatou le tatou lava Malo.

Lau Afioga i le Fofoga Fetalai ma sui usufono mamalu o le Maota, e fia faaleo le agaga faafetai a le Malo i a tatou paaga o lo o saofaga i le atinae o Samoa, faafetai agalelei ma lagolago mai i le atinae o le tatou atunuu.

E fia faamauina foi le faafetai i le mamalu o le atunuu mo la outou lagolagosua aemaise o talosaga aua se manuia o le tatou atunuu. O la matou tatalo, ia i ai pea le agalelei ma faamanuiga a le Atua ia Samoa a o tatou agai atu i le faamanatuina o le 53 o le Tutoatasi o lo tatou Malo.

### **Lafo mo le Tolopoina**

Lau Afioga i le Fofoga Fetalai, i le agaga faaaloalo tele, ou te tuuina atu ai le Tala Faatatau Autu o le Tupe mo le tausaga 2015/2016 mo le lauiliuina e le Palemene. Soifua.

*Na faaalia le agaga fiafia o le Maota i le patipati o latou aao ina ua maea le Saunoaga a le Minisita o Tupe i le Tala Faatatau o le Tupe 2015/2016.*

**FOFOGA FETALAI:** E momoli atu le agaga faafetai tele e tusa ai ma le saunoaga autu o le tatou Tala o le Tupe na saunoa i ai le Afioga i le Palemia, ma e manatu foi o lea ua manino le faafogaga a le Maota vaeane le tapuaiga a Samoa o lo o tatou faatasi aemaise foi o le faafogaga tapuai mai a si o tatou atunu. E momoli atu ai le faafetai tele e fai ai lou leo e fai ma fofoga taumomoli o le Maota nei e faafetai atu ai i lau Afioga i le Palemia ma lau Matagaluega, aemaise o le Ofisa Sili o Pulega o le Matagaluega o Tupe ma le paia o le Kapaneta e ala i le tapenaina mai o lenei Tala o le Tupe. Ou te talitonu o lea ua taatia le lafo a Lualemaga i le Maota nei ma tatou manatu ai, ua faatulaga i a tatou Tulafono Tumau, o le a tuu atu i aao o le Afioga i le Taitaifono ma le Komiti o Tupe i totonu o le 14 aso, ona faapena lea ona toe lipoti mai i le tatou Fono Aoao. Ou te manatu ua tatou taunu ai foi i le taunuuga o tatou galuega o lenei aso.

Tulai mai lau Afioga i le Palemia.

### **LAFO MO LE TOLOPOINA**

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu ma le faaaloalo, *Ina ia tolopoina nei Taualumaga a le Fono Aoao Faitulafono seja aulia le Aso Tofi, 18 Iuni 2015.*

*Faaluaina e le Sui Palemia ma le Minisita mo Galuega Tau Alamanuia ma Atinae a le Malo.*

### **SAUNOAGA FAAFETAI A LE FOFOGA FETALAI**

**FOFOGA FETALAI:** Ae le i faamaonia le lafo, ia o le agaga lena na aveatu nei e le Fofoga Fetalai o le faafetai atu.

Faamalo atu le onosai i lenei aso i le paia ma le mamalu o le tatou Maota i sui usufono mamalu uma o le tatou Maota Fono, e manatu ia ua fai sina tele o le tatou galuega o lenei aso, e le gata i nisi o Tulafono taua e i ai le tatou Tulafono Tau Faaofi o Teuteuga o le Tulafono o Faiga Palota (Nu. 2) 2015, aemaise o le Tulafono Tau Faaofi o Teuteuga o le Faavae (Nu. 2) 2015, ia o lo o faapena ona manatu ua tatau ona matua tilitili aluloa ina ia faataatia i lagotonu le faagaoioiga o galuega a le Faiga Palota.

### **Saunoaga Faafetai a le Fofoga Fetalai**

O lea ua matauina i lenei aso, ua faaiuina ma ua tuu atu loa aua le faagaoioiina o galuega e pei ona masani ai.

O le agaga faafetai lea e momoli atu i le paia ma le mamalu o le tatou Maota Fono, ia ua tini tauao le tatou galuega ma o lea ua suni tau i le tini, ona o lo outou onosai, aemaise foi o le lavapapale ma le sailiga o le tatou tofa e le faigofie. Ou te manatu o a foi upu ma tala ma tiuga o le vaatele i lenei aso, ia tatou lafo i nuu le aina, e toe sau malama, o le taeao fou e tatou te moe manatunatu ma moe alaala ma o tatou lagona faatasi le agaga faafetai i le Atua, o lea ua tatou taunu i le faaiguia o le galuega o lenei aso.

E i ai le faamoeome e le aoaia e Laupua Tamafaiga i lau Afioga i le Taitaifono ma le Komiti o Tupe, ia o tatou tulaga masani i le faaaauauina o tatou galuega, e lafo atu i la outou pitolaau aua le lauiliuina ma toe lipoti mai i le tatou Maota, ona faapena lea ona toe faagasolo ai Taualumaga o le tatou Fono Aoao.

Faafetai atu foi i le tapuaiga a si o tatou atunu Samoa, ia e manatu i lenei aso ua logo logo lau faafogofa, ua logo faa-Tutuila lau tapuaiga, e manatu foi e le mafai ona alo tamala le Palemene leaga o lo o e po pea le fala ma ula le mulila, i lou tapuai mai a o matou alo i feau ma tiute ma galuega aemaise lo matou valaauiina. Faamalo tapuai, faafetai tatalo i le paia o le atunu ma le Aufaigaluega, o lea ua ae ma le manua le Fonotaga o lenei masina ma lenei aso, aemaise o lea ua faatini le Tala Autu o le Tupe e lipoi ai ma lufilufina le tamaoaiga o le atunu aua se manua mo Samoa a taeao.

E faaiu sa matou faamatalaga i Faauluuluga o Matagaluega ma Faalapotopotoga a le Malo, malo le onosai, e manatu o lenei aso o lea lava e tou te faaopeopea ma outou aitaumalele i le Maota nei ona o lo outou manatu, ia o lo outou faiva alofiliima lea aua le tautuina o lo tatou Malo, ia maua lo outou malosi i le tino le agaga ma le mafaufau e faafoefoe ai a tatou galuega. E ofo alofa atu ma momoli atu moomooga alofa mo le tatou Sisigafua o le a tatou alo atu i ai, talosia i le Atua ia ulimasao mea uma. Ia mamao ni lagilagia ma ni mala o fotuai mai i le atunu, ae ia tumau ma folau Samoa i le lagima ma le soifua manua.

Ae le i faaiuina le tatou Fonotaga ou te tatalo atu i lau Afioga i le sui usufono mo Sagaga le Usoga o se tasi o sui usufono fou o le tatou Maota e tulai mai e fai se tatou tatalo faaiu, ia ona tatou malolo ai lea.

*Na faamaonia le lafo.*

*Na tolopo Taualumaga a le Fono Aoao i le itula e 2:11 i le aoauli seia aulia le Aso Tofi, 18 Iuni 2015.*